

Hebrew Bughunek K'eyahalhtuk Hubuts'un K'e'éduguz

K'an 'et degha nus dzin hoh Yak'usda buYe' 'en be newhulh yalhtuk

¹ Hoh da lhat 'ink'ez lhelhts'un na'a, niz haóodanzut, Yak'usda ba nus whunilh'en, 'en hubugha netsuhda hezulh, 'en Yak'usda hubulh yaílhtuk. ² 'Aw 'et njan dek'elh'az dzin hoh Yak'usda buYe' 'en be nelh yaílhtuk. 'En zeh 'uja be'aBá ndai yit'i, 'i ts'iyawh bube'ildzun tele, 'et whuz na'a be'aBá yutl'ahó'ai. BuYe' 'en be 'uja ts'iyaintsuk 'uhóonla. ³ 'En zeh 'int'ah be'aBá ye dézti, 'i newhunelhtan. 'Ink'ez be'aBá dant'ah, 'et buYe' 'en soo ts'ah'un yundult'ah. Ndai 'uhóonla, bughunek ulhtus, 'i be yalhtuk, 'i be ndulhcho hoontun. 'En dich'oh 'uja, nelubeshi 'i ts'iyawh neba yuna'dalhde. 'Et hukw'elh'az yak'uz ts'ih ndun degha nus ncha, 'en nalhnih ts'ih yughu nátl'adeda. ⁴ 'Et huwa ndunnah lizas huba 'o nus ncha 'int'ah. Ndi boozi bugha ídelts'ut, 'i lizas buboozi ba 'o nus dézti ho' 'int'ah. 'Et nduhóolcho hoh bugha ndoh 'int'ah.

Yak'usda buYe' 'en lizas hubugha ndoh 'int'ah

⁵ Ndez na'a njan ndúhoont'ah, Yak'usda 'aw 'il-hunuh lizas 'et nduchaoobudínil,
"Nyun suYe' 'unint'ah.

'Et huwa k'an 'et dzin suYe' sinli, whuz na'a nyoozízi." 'Ink'ez njan chah Yak'usda 'utni,

Hebrew Khunek K'uyahalhtuk 1:6 ii Hebrew Khunek K'uyahalhtuk 1:12

“En ba 'aBá tesdle

‘ink'ez si suba 'uYe' tele.”

⁶ 'Ink'ez 'udechoo whuzdli, Yak'usda doo chah
ndi yun k'ut nítelhtelh hoh 'et ndutni,
“Yak'usda bulizas,

‘en ts'iyawh hits'u teni' noolhdzin.”

⁷ 'Et dulizas bughu yalhtuk hoh njan ndutni,
“Bulizas nilhts'i k'una'a 'obinla.

'En hiba 'uhut'en 'uhint'ah 'ink'ez kwun nudúnat,
‘i k'una'a hubulhtsi.”

⁸ 'Et whunts'ih buYe' yughu yalhtuk hoh ndez
na'a 'et ndutni,

“O Yak'usda nts'e hoh hubudayi cho inli, 'et 'i 'ilhuz
wheni 'int'ah.

'Ink'ez ts'ah'un na'a k'une' whutel'en.

⁹ Ts'ah'un 'ohoont'ah zeh hukw'entsi'.
‘Uk'únucha'ust'en, 'i buts'u díntnik.

'Et huwa O Yak'usda, nYak'usda ndi khe,
‘i dune be ba ts'odelhti,
‘i bugha budzi hoont'i,
‘i nyulh dune ba nus lhai be nyúlhhlho.”

¹⁰ 'Ink'ez 'udun chah bughunek 'i 'uk'e'edúguz
hoh 'et ndutni,

“Moodihti nyun 'udechoo whe'whudit'en 'et
whuts'un, ndi yun inla.

Nyula be yaz chah 'uhóonla.

¹¹ I ts'iyawh hoolah whutéleh, 'et whunts'ih nyun
‘ilhuz wheni 'int'ah.

Ndai inla, 'i 'ants'i naih jut 'ulhih teh whuz
na'a 'uwhutenilh.

¹² 'Ink'ez nahiyits'uz, 'i k'una'a lhenántetelh,
‘ink'ez 'uyoo natedle.

'Et whunts'ih nyun whuz na'a zeh 'et ndint'ah.

Nye naooduzuk 'et 'aw whulátahchahóolah,”
Yak'usda 'et ndi yúlhni.

Hebrew Khunek K'uyahalhtuk 1:13 iii Hebrew Khunek K'uyahalhtuk 2:4

13 'Et whunts'ih Yak'usda bulizas 'aw 'ilhunuuh whunts'i njan nduchaoobudínil,
“Nch'a hudetni ts'iyawh nke hubuk'ut natelyis
mba hubutelhtsilh.
'Et whuts'un 'et duhóoja t'eh,
nalhnih ts'ih suzih tanda.”

14 'Et ndez na'a njan dúhoont'ah, ndunnah lizas, 'en nudúdeh 'ink'ez be ne'úst'en 'uhint'ah. Yak'usda whébalh'a 'et t'eh ndunnah ndi bé uzdujih, 'i nuhts'ite'alh, 'et huba neba ne'hut'en 'uhint'ah.

2

Ndi 'ilhuz be ts'ukhutena, 'i bulazdootnih gunih

1 'Et huwa Yak'usda bughunek ndet whulh úzdants'o, 'et soo ts'ah'un na'a ts'uhotun 'ink'ez nedzi yuh nits'ú ho'ahlh. 'Et nduchats'inal t'eh, 'et sih bulazdootni. **2** 'Et hoh da ndai khunek lizas, 'en be Yak'usda ba yahálhtuk, 'i khunek ts'iyawh 'ilhuz wheni 'utni. 'Ink'ez ndunnah ndi khunek hidutéts'o hukwa cha'nízun 'ink'ez k'uhiyeyus, 'en hoontsi' k'una'a huba k'elha whuzdli. **3** 'Ink'ez ndi whe uzdujih, 'et hooncha ho' hoont'ah. 'Et ts'iyawh neba 'ants'i 'uhoont'ah t'eh, 'et t'eh 'en buk'una'a neba k'elha whutele. Nemoodihti ndi yun k'ut nuséya, 'et whuts'un ndi whe uzdújih howu yalhtuk, 'ink'ez ndunnah ndan hidants'o, 'en ndi khunek ts'iyawh whunehunelhtan 'et ts'ah'un 'uhoont'ah. **4** 'En lhat hoolhtus huwa 'ét'en tune' hust'en, 'ink'ez nts'e na'a Ndoni hukwa' ninzun k'una'a hubutl'a hó'ai, whuz na'a ndunnah 'i be neyulh yahalhtuk, 'en Yak'usda hubulh 'ut'en hoh whunéhunelhtan daja nehudáni 'et ts'ah'un 'uhoont'ah.

*Yak'usda buYe' 'en lizas 'astl'iyaz degha nyoh
'ant'e*

⁵ 'Et njan howu yats'ulhtuk ndi k'an 'et, 'i yun 'i
buk'uzdutélhts'i huwa, neba whuz de whélts'ulh,
'et Yak'usda 'aw lizas dune k'une'hool'en 'uhoot'e
chaoobudínil. ⁶ 'Et whunts'ih 'udun chah
'uk'e'eduguz hoh 'et ndutni,
“Dune di hinli ho' hint'ah?

Yak'usda di ka bughu nuní ninzut?

K'us dune ye' di ka bughu ni tanle?

⁷ 'Astl'iyaz huba lizas degha nyoh 'int'ah silhtsi
inle.

Degha nus ncha silhtsi 'ink'ez hoh dezti,
'et hubutl'aho'ai.

Ndai nyula be 'inla,

'i ts'iyawh huwandoh 'int'ah bugha ooní'ai.

⁸ Ts'iyaintsuk buke yah ninínlá yuMoodihti wule
ka.” 'Ink'ez ndi buke yah nenínlá, 'i 'aw
hoonliyaz be'et cha'ínel. 'Et whunts'ih
t'ets'oninzun 'awhuz ts'iyaintsuk buke yah
nicháskat.

⁹ 'Et whunts'ih ndun 'astl'iyaz huba lizas
hubugha nyoh 'int'ah yulhtsi, 'en uznih'en. Sizi
'en 'int'ah. Dzuh nusuzut hoh dazsai, 'et huwa
degha nus ncha yulhtsi 'ink'ez hoh dezti, 'et chah
yutl'ahó'ai. 'Et whuz na'a Yak'usda ye unzoo, 'i be
ts'iyanah ba dazsai.

*Yak'usda buYe' 'en bugha lhanah Yak'usda ba
'uduni' dudulya huzdli*

¹⁰ 'Et be'aBá 'en bugha ts'iyaintsuk 'uhoont'ah,
'ink'ez ts'iyaintsuk buts'un hahonkat. Lhanah
hubuzkeh, 'en Sizi whudézti, 'et hubutl'a óote'ah
hukwa' ninzun. Sizi 'en whezdutejih 'et neba
netsuh nusíya 'int'ah. 'Et huwa Yak'usda 'en

Hebrew Khunek K'uyahalhtuk 2:11 v Hebrew Khunek K'uyahalhtuk 2:17

buba ts'ah'un 'uhoont'ah hoh Sizi dzuh nusuzut,
'et 'i bugha ts'ah'un 'ulya suli yulhtsi. ¹¹ 'Et
ndun Yak'usda buba 'uduni' dudulti, 'ink'ez ndun-
nah Yak'usda ba 'uduni' dudulya chah nuwheni
ts'iyawh lhulhuga zeh 'uts'int'ah. 'Et Sizi 'aw
hukwaya chailah hoh sulhutsinkah nélhni. ¹² 'Et
whuz na'a be'aBá ndi yúlhni hoh njan ndutni,
“Nyoozi 'uwhulhni,

'i bugha sulhutsinkah hubudutésnilh.
Yak'usda buba 'ilhunahuwúdulh hubutah,
mba whudutélhti hoh mba tesjun.”

¹³ 'Ink'ez doo chah ndez na'a njan ndutni,
“Si, but'aníuntestan.”
'Ink'ez doo chah zeh ndez na'a chah ndutni,
“Njan si 'ust'ah.

Ndunnah 'uskehkah Yak'usda sugha óobuninla,
'en chah ts'iyawh sulk 'úhint'ah.”

¹⁴ 'Et nuwheni yinkak dune ts'inli neyust'e 'i
'uskai bulh 'úlya. 'Et huwa Sizi Gri buyust'e
nuwheni nek'una'a 'int'ah. 'Et hoh lhdulalhgus
k'ut neba dazsai, 'i be ndun yé datetsah, ye ulhtus,
'i yít'i, 'en yuch'a' nilhde, 'en netsudule 'int'ah.
¹⁵ Ndunnah ndi yun k'ut hukhuna, 'en dzin totsuk
dahútetsah whe húnuljut, 'et huwa netsudule dude
'ulhna ubulhtsi, 'en ts'iyawh Sizi Gri lhdulalhgus
k'ut huba dazsai, 'et 'en bugha whuch'a neba
whuladetnik. ¹⁶ 'Ink'ez 'aw Sizi Gri lizas hubula'
tet'ilh huwa ilah whusainya, 'et k'us Abraham ts'u
haínde, 'en hubula' tet'ilh, 'et huwa whusainya.
¹⁷ 'Et huwa dudulhutsinkah k'una'a ts'iyaintsuk
whuz na'a dune k'una'a 'oolneh huba' hoont'ah.
'En huba náwhulnuk degha nus dezti tele, 'et hoh
Yak'usda ba hubugha te'ninzun 'ink'ez 'aw hubula

dootnih ghait'ah. 'Et whuz na'a Yak'usda huba ne'ut'en. 'Et huba dazsai huwa lubeshi 'ulh'en Yak'usda huba 'un whutoolhdelh, 'et t'eh soo cho hubuka naítet'ilh. ¹⁸ 'Et neMoodihti Sizi Gri, lhat hoh óolhdzai, 'et huwa dzuh nusuzut. 'Et huwa ndunnah óolhdzai, 'en nts'e na'a hubula' tet'ilh t'ewhuninzun.

3

Christ, 'uYe' k'una'a hoh be'aBá bukoo huwole

¹ 'Et huwa sulhutsinkah, nuhwheni Yak'usda bube'ildzun ahli, 'et yak'uz ts'un ndi khunek ts'un whúlhni soo ts'ah'un hukw'u na'a ndi yun k'ut doolhúts'i ka, 'et nuhwheni cha hubugha whutelhchulh. 'Et huwa nuhwheni ts'iyawh Christ, Sizi ts'utni, 'en zeh bughunek ghéhtan 'ink'ez 'en k'una'a 'ooht'e. 'En whel'a 'int'ah, 'ink'ez be neba 'alha 'uhoont'ah, 'et huba neba náwhulnuk degha nus dezti unli. ² 'Et whuz na'a Yak'usda 'utaháyalhti. 'Et huwa nts'e na'a yuts'u hukwa 'utni, 'et ts'iyawh lhaóodinla. Nts'e na'a Yak'usda Moses bukoo datet'ilh 'et yuts'u hukwa' ninzun, ts'iyawh lhaóodinla. Sizi Gri 'en chah Moses k'una'a 'int'ah. ³ Nts'e na'a 'uhoont'ah ndan bukoo 'uwhulh'en, 'en koo huwa nus dezti 'int'ah, 'et whuz na'a Sizi Gri Moses degha nus dezti 'int'ah. ⁴ 'Et koo totsuk lhelhyoo 'uhóonla, 'et whunts'ih Yak'usda 'en zeh ts'iyaintsuk 'uhóonla. ⁵ 'Ink'ez Yak'usda bukoo ts'ih Moses 'en huba ne'úst'en unli, 'ink'ez Moses ts'iyawh lhaóodinla. 'Et whuz na'a 'en bugha ts'iyaintsuk lhaóodutetneh, 'et t'eh nts'e na'a Moses dat'en inle, whunenulhtun Yak'usda dawhútenilh t'ets'ontezezh. ⁶ 'Et whunts'ih Christ, 'uYe' k'una'a hoh be'aBá bukoo huwole. 'Et

ndai buka tsi ts'úhooli, 'i nedzi nduk soo cho
'uts'udóolhti, 'ink'ez but'aníuznootan, 'ink'ez degha
nus dzin whuts'un soo cho ts'oontun t'eh, 'et sih
bukoo whut'i ts'inli hoh 'uts'int'ah.

Nuwheni chah whulachats'udoosnih ts'ooke

⁷ 'Et huwa Ndoni 'alha 'utni hoh ndez na'a njan
ndutni,

"K'an 'et dzin Yak'usda bughunek dahts'o t'eh,
⁸ khun nuhdzi doolhts'un gunih!

'Et whuz na'a 'uhooja hoh da ndunnah sch'a detni,
'aw skacha'hunízun.

'Et huwa ndi dzin dune Yak'usda 'en hiyóolhdzai, 'i
hiyúlhni.

'Et nts'e dune chahóot'ih,
'et whuz na'a 'uhooja.

Khun nuhdzi 'aw 'en buk'ah ts'ih 'oohleh gu-
nih!

⁹ 'Et whuz na'a nuhtsuhda suhóolhdzai inle.

Dit lanezi (40) naooduzuk, 'et ndúwhulyez hoh
se' 'ut'en k'ah honilh'en.

¹⁰ 'Et huwa ndunnah, 'en hubulh hunlhuch'e,
'ink'ez njan dudúsni,

'ahoolhyez hubudzi yuh tinta' huwhulh'ih
'ink'ez se' 'ut'en k'ah 'aw t'ehonízun.

¹¹ 'Et huwa hubulh hunlhuch'e hoh buts'u
nahuzíya 'et njan dudúsni,
'Ndet dune nalyis huba 'aw dahóodelh
ghait'ah," ni.

¹² Sulhutsinkah nuhwhenich'oh soo cho
huwahli! Nuhwheni nuhtah bulunah tulih
nuhdzi tink'us 'int'ah 'et 'aw nuhwhuba 'alha'
cha'hóot'ah. 'Et huwa Yak'usda ndun 'ilhuz
wheni 'int'ah, doo ka sih 'en buch'a naoolhú'ah.

¹³ 'Et whunts'ih dzin totsuk, 'awhuz khahna da,
'et ts'iyawh lhba nus whunoolht'uk hoh lhula

Hebrew Khunek K'uyahalhtuk 3:14 viii Hebrew Khunek K'uyahalhtuk 4:1

'oohdut'en. Doo ka sih lubeshi be naniht'a t'eh, nuhdzi duts'un wule. ¹⁴ 'Et 'udechoo whuts'un Christ buk'úne' ts'ut'en, 'et whulatah whuts'un whulh ts'uzyin t'eh, 'et sih Christ be 'ut'en k'ah 'i chah nuwheni be ne'ut'en ts'uzdli. ¹⁵ 'Et whuz na'a 'uk'une'úzguz hoh 'et ndutni, "K'an 'et dzin Yak'usda bughunek dahts'o t'eh, khun nuhdzi doolhts'un gunih!
Ndunnah Yak'usda ch'a yahalhtuk 'aw 'en buk'una'a 'ooht'en gunih."

Dune chahoot'i ts'ih húdelhts'i, huba 'alha cha'hóot'ah, 'et huwa ndet Yak'usda buts'u hoozi, 'aw dahóoya ghaft'ah

¹⁶ 'Et bulunah ndunnah Yak'usda bughunek dánts'o 'ink'ez 'et whunts'ih hich'a detni. Moses yun k'ut Egypt ts'ih hanaóobanla, 'en 'uhint'ah, 'et whunts'ih 'aw ts'iyannah whuz na'a nducháhust'en. ¹⁷ Ndunnah nduhut'en, 'en dit lanezi (40) naooduzuk nduhóolhyez hoh Yak'usda hubulh whúske? Ndunnah 'en dune chahóot'ih ts'ih lubeshi hílhchoot, 'et huwa whuz yahadla. ¹⁸ 'En 'uhint'ah Yak'usda bughunek hik'unucha'it'il, 'et huwa ndez na'a Yak'usda buts'u hoozi, ndet hoh Yak'usda nalyis, 'aw dahóoya ghaft'ah. ¹⁹ 'Et huwa ndez na'a whuts'odul'eh, ndunnah ndan huba 'alha cha'hóot'ah, 'et huwa ndet Yak'usda buts'u hoozi, 'aw dahóoya ghaft'ah.

4

Yak'usda yunéyah 'en 'et nahutelyis 'et huba whuz'ai

¹ Nuwheni njan Yak'usda nalyis nets'u hoozi, nuhwheni nuhtah 'aw tulih chawhulhchulh. 'Et huwa nuwheni ts'iyawh whéznooljut huba'

hoont'ah. ² 'Et 'alha 'en buk'una'a nuwheni chah ndi khunek unzoo, 'i be nelh yaintuk. 'Et whunts'ih ndi khunek be nelh yaintuk, 'i 'aw chahidits'il, 'aw huba 'alha cha'hóonil 'et huwa. 'Aw buben'i tachaaoodikulh. 'Et huwa 'aw bula cha'whudínil. ³ 'Et nuwheni ndunnah huba 'alha 'uhoont'ah, nuwheni njan Yak'usda nalyis nets'u hoozi negha whútelts'ulh. 'Et whunts'ih ndunnah huba 'alha cha'hoot'ah, 'en ndez na'a 'et Yak'usda ndo búlhni,

“Hubulh hunlhuch'e hoh hubuts'u nahuzíya,

ndet nalhúyis, 'aw dahóodelh ghaft'ah.” 'Et whunts'ih nts'e 'udechoo whe'whudit'en ndi yun 'ulya da, hoh da 'et dude 'ut'en lhaidínlá.

⁴ 'Et 'ilhun Yak'usda bughunek 'uk'une'usduguz, 'et skwunlai 'o 'at whulh natdzin (7) whuneodalh'i hoh ndez na'a njan ndutni, “Yak'usda ts'iyawh dude 'ut'en lhaidinla 'ink'ez skwunlai 'o 'at whulh nat dzin (7) 'et nalyiz.” ⁵ 'Ink'ez ndi dustl'us 'et whuz na'a ndutni, “Nts'e na'a buts'u nahuzíya dune nahutelyis, 'aw dahóoya ghaft'ah.”

⁶ Ndunnah ndi khunek unzoo, 'i 'udechoo yudánts'o, 'en 'aw hoh da hik'únucha'it'il. 'Et huwa ndet nalyis, 'et 'aw dachahiyal. 'Et whunts'ih bulunah, 'en 'awhuz hubugha whútelts'ulh ho' hoont'ah. ⁷ 'Et huwa Yak'usda 'et 'ilhut dzin 'uhoont'ah neba 'udun nióoni'ai. “K'an 'et dzin whudezulh,” 'et 'uhoont'ah. 'Et sa hukw'elh'az 'et Yak'usda David be yailhtuk hoh njan ndutni, “K'an dzin 'et bughunek dahts'o t'eh,

khun teh nuhdzi doolhts'un gunih!”

⁸ 'Et ndun Joshua hiyúlhni, 'en Moses k'edanya, 'en Israel ts'un hainzut Yak'usda nalyis, 'et hubugha óote'alh t'eh, 'et Yak'usda hukw'elh'az

Hebrew Khunek K'uyahalhtuk 4:9 x Hebrew Khunek K'uyahalhtuk 4:14

'udun dzin whudézti 'aw doo chah 'o 'un howu yaoolhtuk ghat'ah. ⁹ 'Et huwa t'ets'onínzun Yak'usda 'awhuz nahutelyis, 'et huba whuz'ai. ¹⁰ Ndez na'a njan dúhoont'ah, ndan Yak'usda nalyis bugha whults'ut, nts'e na'a Yak'usda be 'ut'en lhadinla, 'en chah whuz na'a zeh be 'ut'en lhadinla.

'Et Yak'usda bughunek khuna ho' 'int'ah, 'ink'ez hoolhtus túne' 'ut'en

¹¹ 'Et huwa Yak'usda budune nahulyis, nedzi ndulhcho 'i be whuz na'a zeh ts'uhólhchoot. 'Et 'aw ndúchats'ust'en t'eh, 'et t'eh ndunnah 'uk'unucha'ust'en whuz na'a nuwheni chah 'en buk'una'a zeh tinta' ts'ote'alh ho' hoont'ah. ¹² 'Et Yak'usda bughunek khuna ho' 'int'ah 'ink'ez hoolhtus túne' 'ut'en. 'I ndi 'utes cho lhch'az buk'a hoonli, 'i whunts'i 'on nus huba nus khundenyin ho' 'int'ah. Ndez na'a njan dúhoont'ah, 'utes cho nets'un lhghu nunádez'a 'ink'ez neghe 'i ndi chaztet'us, 'et whuz na'a Yak'usda bughunek nezul 'ink'ez neyégha lhk'eítelelh. Nedzi yuh hoh daja uzninzun 'ink'ez nts'e na'a dáztet'ilh hukwa' ts'ut'en, 'et ts'iyawh whunénulhtun. ¹³ 'Ink'ez ndai ndi yun k'ut 'uts'ulh'en, 'i 'aw 'ilhuk'i Yak'usda buch'a ntest'i, 'i hoolah. Ts'iyaintsuk whunilh'en, 'ink'ez 'i k'una'a ts'et niooninkat li'int'ah. Yak'usda 'en dats'et'en, 'et ts'iyawh nduzduténilh ho' hoont'ah.

Nenáwhulnuk degha nus dezti negha te'ninzun

¹⁴ 'Et huwa 'ilhunuh náwhulnuk degha nus dezti neba 'int'ah. 'En 'uja yaz nduhoolcho whutuh lhuséya. Sizi, Yak'usda buYe' 'en 'int'ah. 'Et huwa ndet neba 'alha 'uhoont'ah, ts'iyawh duts'o cho

ts'uhotun. ¹⁵ Nenáwhulnuk degha nus dezti, 'en ndunt'ah ho' 'int'ah. Ndai be laits'it'ah 'i bulh 'ilho negha te'ninzun dats'int'ah t'eooninzun. 'En lubeshi bu'et 'int'ah, 'et whunts'ih 'en chah nuwheni nek'una'a ts'iyaantsuk tink'us óoneh hukwa 'óoldzih inle. ¹⁶ 'Et huwa Yak'usda bukw'usúda cho dézti, 'i whuz de ye únzoo, 'i negha yú'ah. 'Et huwa 'aw whechats'uniljut hoh whuz uztooya. 'Et whuz de negha te'ninzun, 'ink'ez whé nets'un unzoo, 'et nduwhulcho hoh ts'otélhchulh. 'Et whuz na'a 'en ba ndi yun k'ut uzdelhts'i, ndet nela 'ewhuduténilh 'et negha óotelts'ulh.

5

Nawhulnuk degha nus dézti dant'ah tele

¹ 'Et ts'iyanah náwhulnuk degha nus dezti hubulh dedowh hubutahayálhti, Yak'usda but huba nitéyah ka. 'Et huwa 'uyoon hubulubeshi bugha 'et huba Yak'usda bukw'uzdai k'ut huwa t'aih hidutélhk'un 'ink'ez ndai Yak'usda higha hiya'ah huba Yak'usda bukw'uzdai ts'un wheyúlih. ² Ndan Yak'usda yuk'una'a t'echahonízun 'ink'ez tink'us 'ahét'ilh, 'en bugha nagoostl'iyaz ne'bulh'en, dich'oh chah lhat hoh lait'ah 'et huwa. ³ 'Et huwa nts'e na'a 'onghoh hubulubeshi k'elha huwa íte'alh, whuz huba wheyú'ah, 'et whuz na'a 'en whunts'i dich'oh dulubeshi ba huwa íte'alh, 'i chah whuz wheyá'ah. Whuz na'a ndót'en huba' hoont'ah. ⁴ 'Et nts'e na'a náwhulnuk degha nus dezti hulhih, 'aw dune dich'oh 'et nduhóoneh ghaít'ah. 'Et whunts'ih nts'e na'a Yak'usda Aaron 'ut'ahayalhti, 'en k'una'a zeh 'uyoon náwhulnuk degha nus dezti 'utahaóoltelh huba' hoont'ah.

*Christ 'en 'ilhuz wheni náwhulnuk degha nus dezti
'int'ah*

⁵ 'Et whuz na'a zeh Christ, 'en chah 'aw náwhulnuk degha nus dezti 'ududooltih ghat'ah. 'Et whunts'ih ndun yadáni, 'en 'et ndi yúlhni, "Nyun SuYe' 'unint'ah.

K'an dzin whuz na'a SuYe' nyuzílksi."

⁶ 'Ink'ez 'udun chah 'uk'e'éduguz hoh ndutni, "Ndun Melchizedek, nts'e na'a náwhulnuk 'int'ah, nyun chah 'en k'una'a 'ilhuz wheni náwhulnuk inli."

⁷ Hoh da Sizi Gri ndi yun k'ut nuseya, 'et be'aBá 'en ye ulhtus, 'i yít'i, 'et hukwa' ninzun t'eh datétsah whuch'a yutelhyih, ndez na'a Sizi Gri yuts'u tenadédli. Tube budzi tel'en 'ink'ez bunatsul too hoonli hoh Yak'usda yuts'u téduqlih yula 'ooneh ka. Be'aBá yudélhti, 'et huwa yudánts'o daja ni 'et.

⁸ BuYe' yinli 'et whunts'ih ndet dzuh nusúzut, 'et hoh yuk'úne' 'út'en hodel'i. ⁹ 'Et huwa 'uja ts'ah'un 'ulya suli. 'Et huwa ndunnah hi'úne' 'ut'en, 'en 'ilhuz wheni hudujih, 'et hubugha óoni'ai. ¹⁰ 'Et whuz na'a Yak'usda ndi boozi yugha idé'ai hoh ndi dáni, "Ndun Melchizedek nts'e na'a náwhulnuk degha nus dezti 'int'ah, nyun chah 'en k'una'a 'ilhuz wheni náwhulnuk degha nus dezti inli."

¹¹ 'Aw 'et lhat ndun whuzduténih, 'et whunts'ih nedutéhts'o nuhwhuba 'ants'i hoonli. 'Et huwa neba howa whúlha hoh ndi khunek ts'ah'un na'a t'ewhunoohzeh k'una'a nuhwhuts'útni.

*Ndunnah Yak'usda bughunek hiyoozélhts'ai
tahodeznih 'en 'ants'i 'uskehiaz nduhúlt'ah*

¹² 'Et k'an 'et dune hoodulh'eh wahle huba' hoont'ah, 'et whunts'ih soo 'udechoo be whuts'odul'eh, 'i Yak'usda khunek daja ni, 'et

Hebrew Khunek K'uyahalhtuk 5:13 xiii Hebrew Khunek K'uyahalhtuk 6:4

bulunah, 'en doo chah zeh nduhóolcho hoh whunanohodutelh'eh huba' hoont'ah. K'an 'et 'uskehyaz k'una'a 'uts'oo 'i zeh buk'e khahna, 'aw ts'iyi duts'un, 'i ilah. 'Et whuz na'a 'ahja. ¹³ 'Et ndunnah 'uts'oo zeh k'e dune hinli, 'en ndi Yak'usda bughunek ts'ah'un 'int'ah, 'et dzuh nt'ehoninzun. 'Awhuz 'uskehyaz hinli 'et huwa. ¹⁴ 'Et whunts'ih ndi ts'iyi duts'un, 'i hincha huba' yint'ah. 'En ndunnah hoodul'eh howun nuni hunuzut, 'en 'ink'ez hik'une' 'ut'en 'et hubeni ulhtus 'ulheh, 'en 'uhint'ah. 'En unzoo 'ink'ez ntsi' bulh t'ehinínzun.

6

*Yak'usda bughunek buts'odool'eh.
Hukwachats'unízun t'eh tube howa óodli ho'hoont'ah*

¹ 'Et huwa ndi 'udechoo Christ bugha hodulhú'eh, 'et zeh hodoolhú'eh gunih, 'et 'o 'un chah hodoolhú'eh. 'Et sih soo ts'ah'un na'a lhadulya k'una'a 'ooht'e. Ndi 'udechoo whuts'odel'i, 'et koo bukw'uwhuz'ai, 'i ndúlt'ah, 'ink'ez 'i nuwhenich'oh 'aw 'uyoo na'ts'ooleh hukwa cha'uznízun. Ndi 'udechoo whuts'odel'i, 'et ndez na'a njan dúhoont'ah, ndai 'uts'alh'en, 'i 'ants'i 'et 'ohoont'ah, 'aw nela ooneh ghat'ah, 'i ts'iyawh buch'a náts'ool'ah. 'Et nts'e na'a 'ohoont'ah Yak'usda neba 'alha 'int'ah, 'et chah. ² 'Ink'ez nts'e na'a dune too be 'úl'en. Nts'e na'a 'uyoon dune k'ehúdilnih chah, 'ink'ez 'et nts'e na'a 'uhutenilh dune yahadla tah dinahudutédalh. 'Ink'ez nts'e na'a 'ilhuz neba nahutedeh whuz uztedulh. ³ 'Et whuz na'a Yak'usda netl'ahó'ai t'eh, 'et sih ndet soo ts'ah'un na'a lhadulya uzteleh. ⁴ 'Et ndunnah

Christ bugha hohudul'eh 'ink'ez t'ehonínzun, ndi yak'uz howat'aih, 'i hiyílhchoot 'ink'ez Ndoni chah buyídinda. ⁵ 'Ink'ez Yak'usda daja ni, 'et dalzoo, 'i chah hiyílhchoot, 'ink'ez ndet ye úlhtus, 'i whuz de whélts'ulh, 'et chah t'ehonínzun. ⁶ 'Et ndunnah ndunt'ah 'et Yak'usda ch'a nahusdel t'eh, 'en nts'oh dahoont'ah whunts'i, 'aw doo chah whuz na'a dudzi nahodunooleh ghat'ah. Ndunt'ah dich'oh Yak'usda buYe' lhdulalhgus k'enáhiyilhti li'hiyulh'en, 'ink'ez ts'iyanah nalh highudloh. ⁷ Whunulh'en, 'et tube cho nawhúlhtih t'eh, haníyeh ba hoonzoo. 'Ink'ez ts'iyaantsuk ts'uysi, neba hanúlhyeh. 'Et whuz na'a Yak'usda nets'un unzoo. ⁸ 'Et whunts'ih, 'i yun whus 'ink'ez 'ut'an untsi', 'i zeh haníyeh t'eh, 'et t'eh 'aw hoonliyaz chailah ho' 'int'ah. 'Et huwa bukacha'ts'unizun. K'at lih t'eh ts'iyawh uzdutélk'un. 'Et soo cho howu ni óohtan!

*Yak'usda buba ne'ts'ut'en 'aw whunaoodoolnah
ghait'ah*

⁹ Nuhk'ets'ints'i', nuhwheni ndi khunekti be ndun whuhts'utni, 'et whunts'ih Yak'usda ch'a nasahdel chahlah, 'et neba 'alha 'ohoont'ah. 'Et k'us be uzdujih, 'i bugha 'o nus hoonzoo hukw'u na'a 'uteht'ilh, 'et neba 'alha 'ohoont'ah. ¹⁰ Dune Yak'usda bube'ildzun, 'en nuhwheni buba ne'hút'en ahli ínle, 'ink'ez 'awhuz whuz na'a nduht'en. Nuhbe 'ut'en 'ink'ez Yak'usda tube buk'ehtsi' hoh aht'en, 'et ts'iyawh Yak'usda whunilh'en. Yak'usda ts'ah'un na'a zeh 'int'ah, 'et huwa 'aw whunaoodoolnah ghat'ah. ¹¹ 'Et 'ilhunah ahli hoh 'et whulatah whuts'un, nuhdzi ndulhcho, 'i be whuz na'a 'et ndóht'en, 'et nuhwhuba hukwa' uzninzun. 'Et whuz na'a ndet

Hebrew Khunek K'uyahalhtuk 6:12 xv Hebrew Khunek K'uyahalhtuk 6:19

hukwa tsi hoohli, 'et nawh cha'hoot'ah nuhts'un whutekuhl. ¹² 'Ink'ez tsi'dahtnik wahle gunih. 'Et ndai Yak'usda ye nets'u náhezya, 'et ndunnah bé 'alha 'uhoont'ah 'ink'ez sa huba whulh huzyin, 'en hubugha íte'ah whuts'un, 'et nuhwheni chah 'en buk'una'a 'ooht'en.

Yak'usda dich'oh nets'u hoozi Christ buka tsi ts'uholi, 'en 'int'ah

¹³ 'Et 'aw dune Yak'usda gha ndoh 'int'ah hoolah. 'Et huwa hoh da 'et ndi Yak'usda Abraham ye yuts'un náhezya, 'i dich'oh dudoozi be yuts'un náhezya. ¹⁴ 'Ink'ez Yak'usda Abraham yudáni, "Tube nats'un tézsoo. Si sugha nuts'u haínde hute-lai." ¹⁵ 'Ink'ez 'et whuz na'a 'uhooja. Yak'usda Abraham daja yudáni sa hoh whechaítsaz, 'et whunts'ih ye yuts'u náhezya, 'et bughá whults'ut. ¹⁶ 'Et ndet dune hoonliyaz hubugha 'uyoón dune yuts'un nahuteyeh t'eh, 'et ts'ah'un néhote'ah hukwa' huninzun, 'et ndan yugha ndoh 'int'ah, 'en boozi be ts'ah'un nehoho'ah huba' hoont'ah. ¹⁷ 'Et whuz na'a Yak'usda 'uja. Ndai hubuts'u yoozi, 'i bugha íte'ah. Ndai hubuts'u yoozi, 'i 'aw 'ats'un na'a na'hótneh ghait'ah. Soo ts'ah'un na'a t'ehonoozeh ba hukwa' ninzun, 'et huwa dich'oh buboozi be hubuts'un náhezya. ¹⁸ Yak'usda 'aw hots'it ghait'ah. 'Et huwa ndet howu yalhtuk 'ink'ez buts'un náhezya, 'et náwhult'ah 'aw 'ats'un na'a na'hotneh ghait'ah. 'Et huwa t'ets'oninzun Yak'usda 'aw nela dootnih ghait'ah. Nuwheni chah ndet hukwa tsi ts'úhooli, 'et ts'ohótun huba' hoont'ah. 'I bugha nedzi nduk ná'ut'ih. ¹⁹ Ndai hukwa tsi ts'úhooli, 'i nezul, neba bulh tat tsedez'ai li'int'ah. 'Et 'ilhuz duts'o 'ink'ez 'aw naghóotnah

ghait'ah. 'Et njan hukwa tsi ts'úhooli, 'et huwa whúlh nat whuts'oh hukwa delhchooz 'et hukwuz tedulh. ²⁰ 'Et Sizi Gri 'uda 'uja netsuh nusíya, 'en whuz danínya. Melchizedek 'en k'una'a 'ilhuz wheni náwhulnuk degha nus dezti suli.

7

Melchizedek hubudayi cho degha nus ts'ah'un ne'ut'en

¹ 'Aw 'et ndun Melchizedek 'ilhun keyah Salem huwhútni, 'et whuhubudayi cho unli. Yak'usda ts'iyauntsuk huwhandoh 'int'ah, 'en bunáwhulnuk unli. 'Et whuz na'a 'uhóoja hoh, hoh da Abraham 'en whuz na'a lhanah hubudayi cho bulh lhedúghan 'ink'ez lhanah hángahan. 'Et hukw'elh'az dukeyah ts'ih náhutesdel hoh ndun Melchizedek, 'en Abraham yududezya hoh 'et ndez na'a Yak'usda ts'un yuba tenadédli, degha nus hoonzoo yugha hó'alh ka. ² 'Ink'ez ndunnah hubuhanghan ndai hiye 'ánt'e, 'i ts'iyawh huyílhchoot. 'Et ndi bulah, 'i 10% k'ah, 'i Abraham, 'en ndunnah Melchizedek tl'áyanla. 'Et Melchizedek boozi, 'i ndi 'int'ah, ts'ah'un na'a hubudayi cho unli ni, ni ho' 'utni. 'Ink'ez keyah Salem whuhubudayi cho chah unli. 'I be nedzi whudooghel hubudayi cho unli ni ho' 'utni. ³ Be'abá, 'ink'ez be'ama chah chahoolah. Ndun yuts'u haínzut, 'en chah chahoolah. Nkeda hooni, 'ink'ez nkeda dazsai hoolah. 'Et whuz na'a Yak'usda buYe' k'una'a 'ulya hoh 'ilhuz wheni náwhulnuk unli. ⁴ Ndun 'en Melchizedek nts'e na'a dune ncha unli, 'et howu nuní nuhzut. Netsuhda 'int'ah Abraham 'en lhanah yé dinzut, 'et whunts'ih ndai dune hikabuhanghan, 'i 10% k'ah,

Melchizedek tl'áyanla. ⁵ 'Ink'ez 'alha 'uhoont'ah 'i be, Levi hits'uh hainde, 'en zeh náwhulnuk hulhih. Yak'usda hubutl'a hó'ai hoh dune 10% k'ah hiyít'i, 'i nawhulnuk hitl'anáhiyoo'ah huba' hoont'ah. 'En Abraham ts'uh hahánde 'uhint'ah 'ink'ez bubulhutsinkah hinli, 'et whunts'ih 'en whuz na'a 'et nduhút'en inle. ⁶ 'Et Melchizedek 'aw Levi yuts'u hachaizulh, 'et whunts'ih Yak'usda, Abraham ye yuts'u náhezya, 'i yugha óoni'ai, 'ink'ez Abraham 'en 'uja 10% k'ah yutl'áyanla. 'Ink'ez Melchizedek, Yak'usda ts'un yuba tenadédli degha nus hoonzoo yughá ho'alh ka. ⁷ 'Et nawh cha'hoot'ah ndan degha ndoh 'int'ah unli, 'en duk'elh'ih 'int'ah, 'en ba tenadédli. ⁸ 'Et dez na'a 'et 'uhoont'ah, ndunnah Levi, 'en chah 'ants'i yinkak dune zeh 'uhint'ah, 'ink'ez whuz na'a zeh yahadlah, 'et whunts'ih ndi 10% k'ah, 'i chah whuz na'a zeh nahiyulhdzooh. 'Et Melchizedek, 'en 'int'ah 'ilhuz wheni khuna hiyúlhni, 'en 'uyinla Abraham 10% k'ah yugha yú'aih. ⁹ 'Et ndez na'a njan dúzdutenilh, Levi 'en 10% k'ah nalhdzooh 'int'ah, 'en whunts'i Abraham bugha Melchizedek 10% k'ah yugha yú'aih. ¹⁰ Whunulh'en, whutsuh da Melchizedek, 'en Abraham ghu ninya hoh, 'et Levi 'awhuz chawhusle hoh.

'Uyoon náwhulnuk whusatéyah

¹¹ 'Et huwa ndunnah Levi ts'uh hahánde, 'aw 'en zeh dune ba náwhulnuk hulhih 'ink'ez 'en hubugha Yak'usda bughunek netl'aída'ai, 'et whunts'ih 'en hubugha ndet Yak'usda nets'u hukwa' ninzun, 'et ts'iyaantsuk lhachaóodusneh. 'Et whuz na'a ts'iyanah t'ehonózin huba' hoont'ah, 'uyoon náwhulnuk whusatéyah. Ndun náwhulnuk

Hebrew Khunek K'uyahalhtuk 7:12xvii Hebrew Khunek K'uyahalhtuk 7:19

whusatéyah, 'aw Aaron nduchailt'ah. 'Ink'ez Melchizedek k'una'a ootedzi. ¹² 'Et ndet howa ndunnah zeh náwhulnuk hulhih, 'et Yak'usda lhk'enaóoda'ai t'eh, 'et bughunek butl'a ída'ai, 'et chah 'uts'un na'a na'whutétnilh huba' hoont'ah. ¹³ 'Et ndun bughu yats'ulhtuk, 'en neMoodihti 'int'ah, 'en 'udooh dedowh hubuts'uh haínzut 'int'ah. 'Ink'ez ndunnah 'udooh dédowh 'aw náwhulnuk hoole ghaït'ah. 'En Yak'usda bukw'uzdai k'ut 'aw hoonli hudóolhk'un huba cha'hit'ah. ¹⁴ 'Et neMoodihti 'en Judah dedowh ts'ih haínzut 'int'ah, 'et ts'iyanah t'ehonínzun. 'Ink'ez 'en náwhulnuk huteleh hubugha, Moses 'aw howu yachaílhtih. ¹⁵ Njan 'o nus soo t'ewhuntehzeh 'et nuhts'u hukwa' nuszun, 'et Melchizedek k'una'a 'uyoon náwhulnuk whusatéyah t'eh, ¹⁶ 'et ye khuna, 'i be 'aw hoolah hiyoohltsilh ghaït'ah, 'et whuz na'a Sizi Gri náwhulnuk suli. 'Et whunts'ih nts'e na'a Yak'usda bughunek be dune Aaron ts'ah hainzut hoh náwhulnuk tele, 'aw 'et huwa ilah. ¹⁷ 'Et whuz na'a Sizi Gri bughu Yak'usda bughunek njan ndutni,

"Ndun Melchizedek, nts'e na'a hoh náwhulnuk unli,
nyun chah 'ilhuz wheni náwhulnuk inli."

¹⁸ 'Et ndez na'a njan dúhoont'ah, 'udechoo khunek butl'aidélts'ut da, 'aw dune la'hoot'en ghaït'ah. 'Et huwa Yak'usda 'udun niwhuni'ai. ¹⁹ 'Et ndai 'udechoo Yak'usda bughunek netl'aída'ai, 'i be 'aw dune soo lhadúlya hoole ghaït'ah. 'Et whunts'ih hoonli hoh 'et 'o nus hoonzoo hukwa tsi ts'úholi. 'Et t'eh 'o nus Yak'usda beghah uztet'ilh.

Njan 'et ndez na'a Sizi Gri náwhulnuk degha nus dezti neba unli

20 'Et Yak'usda dich'oh bughunek be Sizi Gri yuts'un náhezya 'et ndi dáni, "Nyun 'ilhuz wheni náwhulnuk inli." **21** 'Et whunts'ih ndunnah Aaron náwhulnuk Yak'usda 'aw whuz na'a buba nachahíyel hoh náwhulnuk huzdli. 'Et whunts'ih dich'oh ts'ah'un yuts'un náhezya, 'et huwa Sizi Gri náwhulnuk unli. 'Et whuz na'a Yak'usda bughunek 'et ndutni,

"Moodihti bughunek yutl'aída'ai,
dudeni 'aw 'ats'un na'a na'yooleh ghat'ah.
Melchizedek k'una'a nyun chah 'ilhuz wheni náwhulnuk inli."

22 'Et whuz na'a ndi k'an khunek nets'un lhaidinla, 'i, Sizi Gri neba dazsai, 'et 'i be nets'un whutekulh ho' hoont'ah. **23** 'Et ndunnah náwhulnuk lhanah hinli 'et whunts'ih 'ilhunu hini hoh ts'iyawh yahadla. 'Et huwa 'aw 'ilhunu 'ilhuz wheni náwhulnuk wule ghat'ah. **24** 'Et whunts'ih Sizi Gri 'ilhuz wheni khuna, 'et huwa neba náwhulnuk unli, 'aw 'uyoona dune yuk'édooya hoolah. **25** 'Et huwa ts'iyana, 'en be bugah Yak'usda hiyeghah hutet'ilh, ts'iyawh 'en huba ye ulhtus, 'i yít'i hoh soo ts'ah'un na'a hubutelhyih ka. 'En 'ilhuz wheni khuna 'ink'ez neba tenadudli 'et huwa. **26** Njan 'et ndez na'a Sizi Gri náwhulnuk degha nus dezti neba unli. Lubeshi bughu hoolah, 'aw buk'eholts'it chah hoolah. 'Ink'ez tink'us 'ohoont'ah 'aw hoontsolyaz whunts'i buk'uz chawhést'en. Lubeshi 'ulh'en hubulh 'ut'en inle, 'et whunts'ih 'aw 'en buk'una'a ndi yun k'ut chaidal. 'Ink'ez buch'a nasja. 'Ink'ez 'en yak'uz whanus dézti suli. **27** 'Aw Lizwif huba náwhulnuk

degha nus dezti hubunduchaílt'ah. Ndunnah nawhulnuk dzin totsuk hedich'oh hubulubeshi ba Yak'usda bukw'uzdai k'ut 'uhudélk'un. 'Et hukw'elh'az dudulh dune ba Yak'usda bukw'uzdai k'ut 'uhudélk'un. 'Et whunts'ih k'an 'et Sizi Gri ts'iyanah ba dich'oh 'et 'ilhuh zeh 'ink'ez 'ilhuz wheni nelubeshi k'elha dazsai. ²⁸ 'Et dune bulubeshi bugha lahít'ah 'et whunts'ih ndai hoh da Yak'usda khunek netl'aída'ai, 'i be dune náwhulnuk degha nus dezti nahutedle. 'Et ndai Yak'usda bughunek Moses yuk'une'úzguz, 'i buk'elh'az, Yak'usda buYe' 'en bugha nets'un nahezya náwhulnuk degha nus dezti tele. 'En 'int'ah, buYe' 'en 'ilhuz wheni soo 'et lhadulya suli.

8

Sizi k'an 'et náwhulnuk degha nus dézti unli hoh dude 'ut'en k'ah huwaghúna

¹ 'Aw 'et njan daja uzdani, soo ts'ah'un na'a t'ewhunoohzeh nuhts'u húkwa 'uzninzun, nuwheni neba náwhulnuk degha nus dezti ts'it'i, ndun yak'uz k'us úncha, 'en bukw'usúda cho dézti, 'i nalnih ts'ih yughu nátl'adeda. ² Ndi ndai bun cho neMoodihti nené'ai, 'i ts'ah'un na'a 'ohoont'ah. 'I 'aw dune ilah není'ai. 'Et huwa 'udéni bun bet whubez, 'et degha nus whudézti ts'ih, 'et chah Sizi Gri neba ne'ut'en. ³ 'Et ndunnah náwhulnuk degha nus dézti hinli, 'en Yak'usda bukw'uzdai k'ut 'udelhk'un 'ink'ez hoonliyaz Yak'usda bugha hóo'ahlh huba' hoont'ah. 'Et whuz na'a ndun dune bughu yats'ulhtuk, 'en chah hoonli huwa óo'ahlh huba' hoont'ah. ⁴ 'Et lhanah nawhulnuk ndi yun k'ut, 'en nts'e na'a Moses bughunek k'una'a, 'et whuz na'a 'et nduhút'en. 'Et huwa Sizi Gri 'awhuz

ndi yun k'ut usda t'eh, 'aw da náwhulnuk chailah wule. ⁵ Ndunnah bun cho t'ah ts'ih dune huba ne'hut'en t'eh, 'et ndi bun cho 'et yak'uz whuz'ai, 'et whunduhúl'en ho' hut'en. 'I yak'uz dahoont'ah 'et whunduhúl'en li'hut'en. Hoh da Moses bun cho níté'ah hoh, Yak'usda yudáni, "Nts'e dzulh k'ut bun cho nítéts'ulh whunyunelhtan, 'et wheni bughá ne'tant'en, 'i mba 'usdla, 'i k'una'a 'onleh. 'Et nts'e na'a whúnyunelhtan, nduhóolcho hoh whuz na'a 'onleh!" ⁶ 'Et whunts'ih Sizi Gri ndunnah 'o nus soo huba ne'út'en suli. Ndi degha nus hoonzoo khunek nets'u lhaídinla, 'i, 'et huwa Sizi Gri 'en hubéguz unli. Yak'usda 'o nus hoonzoo k'una'a nets'ú hoozi, 'et whuz na'a neba 'uhóonla.

K'andit khunek nets'u lhaídinla

⁷ 'Et njan khunek 'udechoo khunek hubuts'u lhaídinla, 'i huba hoolhtus, 'aw hik'unecha'ít'il. 'Et huwa 'i bugha dune Yak'usda nallh ts'ah'un cha'hit'ah. 'Et huwa doo chah whulh nat nets'u nahezya. ⁸ 'Ink'ez Yak'usda, 'en ts'iyawh hukwa' hubudáni. 'Et whuz na'a bughunek 'uk'e'edúguz hoh njan ndutni,

"Sih soo zélhts'ai, 'ilhudzin whuz de whélts'ulh,
'et whusawhélts'ut t'eh,
'et Israel hubuyun k'ut húdelhts'i,
'ink'ez Judah hubuyun k'ut húdelhts'i, 'en chah
njan k'andit khunek huba lhaídutesdlilh.

⁹ Hoh da dunnah 'udechoo khunek huba lhaídusdla,
'et whulh nat 'aw hukw'u na'a cha'whutést'il.
'Et hoh da hubula ílhchoot
'ink'ez Egypt yun k'ut hukw'u nabutéla.
'Et whunts'ih sughunek 'aw chahiyílhchulh,
'et huwa hubula desnik.

Hebrew Khunek K'uyahalhtuk 8:10 xxii Hebrew Khunek K'uyahalhtuk 9:1

- 10 Et hukw'elh'az Israel buzkehkah soo k'andit,
'i khunek huba lhaídutesdlilh.
Ndez na'a ndótet'ilh, suk'ah ts'ih 'et hubeni taóodutesdlel,
'ink'ez hubudzi k'ut chah 'uk'e'tesgus.
'Ink'ez si hubuYak'usda tesdleh,
'ink'ez 'en sudune hutele.
11 Hoh t'eh ts'iyawh 'ilhunuh hinli hoh 'uskehyaz
'ink'ez ye 'un hudedoh bulh 'ilho, Si t'esontezeh.
'Et datést'ilh,
'et huwa hubéghah whut'i,
k'us dudulhutsinkah 'aw 'ilhunuh whunts'i,
doo chah zeh 'neMoodihti bugha hoodulh'eh!
hudooni huba cha'hoot'ah.
12 'Et dáhoont'ah 'aw ts'ah'un cha'hust'en t'eh,
'et huwa bugha té'unteszeh.
'Ink'ez hubulubeshi 'ink'ez sk'unúcha'ust'en,
'et 'i ts'iyawh 'o 'un 'aw huba whunaoolhunih
ghait'ah."
13 'Et huwa Yak'usda ndi soo k'andit khunek neba lhaídinla, 'i howu yailhtuk, 'et dája ni hoh ndutni, 'i bugha njan 'udechoo khunek huba lhaídinla, 'i 'aw hoh cha'hoot'ah suli, 'et huwa Yak'usda neba lhk'enaooda'ai, 'ink'ez 'udechoo khunek huba lhaídinla 'aw 'o 'un buk'une' ts'oot'en ghait'ah.

9

Hoh da bun cho 'ulya

- 1 'Ink'ez njan 'udechoo khunek huba lhaídinla, 'i be wheóobunelhtan nts'e na'a nawhulnuk Yak'usda ba ne'hóot'en huba' hoont'ah. 'Ink'ez ndet bun cho 'uhuhóonla, 'et Yak'usda ts'un teni' hunalhzin

'ohoont'ah. ² 'Ink'ez bun cho be 'uhóolya, 'et ndez na'a njan dúhoont'ah. 'Udechoo whabbez ts'ih, 'et skwunlai 'o 'at nankoh (7) kwun buk'udezk'un, 'i 'et sukai. 'Ink'ez kw'uzdai lhes buk'úyuzzla, 'i nul'en, 'i chah 'et sukai. 'Et njan 'udechoo whabbez ts'ih, 'et whudézti 'ohoont'ah. ³ 'Et 'o ni whulh nat whuts'uh hukwa' delhchooz, 'et degha nus whudézti ho' 'ohoont'ah. ⁴ 'Et whabbez ts'ih kw'uzdai 'i ndulhcho 'i bunat gold be 'ulya, 'i 'et sukai. 'Ink'ez 'i k'ut bulut sooltsun, 'i hidélhk'un. 'Ink'ez ndi chunkhelh cho, 'i chah bez ts'ih 'ink'ez yoo'az ts'ih, 'i bunat ndulhcho gold be 'ulya, 'i chah 'et sukai. 'Ink'ez Yak'usda khunek huba lhaídinla, 'i buchunkhelh 'int'ah. 'I bez ts'ih gold 'oosa' chah be sa'ai. 'Et ndi gold 'oosa', ndi lhes manna hiyulhni, 'i bé yuz'ai. Aaron butuz, ndi tuz 'i 'int'ah, 'ut'an buts'un haínalhyi inle, 'i chah be ídeztan. 'Ink'ez ndi lanezi khunek netl'aída'ai, 'i tse k'ut 'uk'une'úsduguz, 'i chah be ídez'ai. ⁵ 'Ink'ez ndi chunkhelh cho k'ut, ndunnah Cherubim hubuts'útni, 'en hube Yak'usda yé dezti t'ets'oninzun, 'et huwa ndi chunkhelh 'i k'ut 'uhint'ah. But'agha whutus lht'aghútnaih hiyulhtsi, 'i t'ah, 'et 'i k'ut 'uskai yuk'unédelht'ik hoh Yak'usda soo cho nets'u naítoot'en ka ts'uwhúttni. 'Aw ndi ts'iyawh howu yats'oohlhtuk ghat'ah.

'Udechoo bun cho 'ulya, 'i buyah Yak'usda bukw'uzdai k'ut hidelhk'un, 'i 'aw 'et hoh tinta' ts'unt'en neba 'un whutookat ghat'ah

⁶ 'Et ndi ts'iyawh nts'e hubula huba' hoont'ah, 'et nihíninla. 'Aw 'et 'udechoo whabbez ts'ih 'et ndunnah nawhulnuk, 'en dzin totsuk ne'hut'en. ⁷ 'Et whunts'ih náwhulnuk degha nus dezti, 'en 'ilhuh naooduzuk totsuk 'ilhuh zeh 'o ni whulh nat ts'ih

nuyih. 'Uskai bu'et t'eh, 'aw whuz tooya għait'ah. 'Et ndi 'uskai dich'oh duba chah 'ink'ez ndunnah 'aw t'ehonízun hoh lubeshi hilchukw, 'en huba chah, 'en ts'iyawh hubulubeshi huwa whuz Yak'usda nalh wheyúkaih. ⁸ Ndez whuz na'a Ndoni whuneoodulh'eh, ndi bun cho 'awhuz 'et su'ai t'eh, 'et degħa nus whudézti ts'ih, nts'e Yak'usda 'int'ah, 'aw whuz dats'óoya għait'ah. ⁹ 'Et ndúhoont'ah, 'et huwa hoonli whuts'odul'eh huba' hoont'ah. Ndan Yak'usda ba huwa īte'ah, 'ink'ez Yak'usda bukw'uzdai k'ut yudutélhk'un, 'en 'i be Yak'usda ba ne'tet'en, 'et whunts'ih 'awhuz buyuh ts'ih bugħa nt'ets'onínzun* 'aw ts'ihnu lhadulya ho' hoont'ah. ¹⁰ 'Ants'i ndai hite'ah, hitetnlh, lhelhts'un na'a toonahuwhúgus, 'ink'ez ndai buyust'e ba ts'ah'un 'int'ah, ndi 'i ts'iyawh nus de k'an 'et Yak'usda ba ne'hutet'en, hoh t'eh huba whusawħütelts'ulh, 'et whuts'un, 'et whuz na'a 'uhoot'en whuba' hoont'ah inle.

Sizi Gri dich'oh buzkai be tinta' ts'unt'en neba hoolah whulhtsi

¹¹ 'Et whunts'ih Christ náwhulnuk degħa nus dezti unli hoh whusainya. Ndet hoonzoo whusaóotekulh, 'en 'et negħha whútelelh. Ndi bun cho degħa nus nħħa, 'i 'ink'ez 'o nus ts'ah'un na'a 'uhoont'ah, 'et hoh neba ne'ut'en. 'Aw dune ilah 'uyinla. 'Aw ndi yun k'ut ilah 'uhóolya. ¹² Sheep 'ink'ez musdusyaz bubuzkai, ndi degħa nus whudézti ts'ih 'aw whuz whechayikal. K'uś dich'oh duduzkai, 'i be degħa nus whudézti ts'ih whuz whinya. 'Ilħuż zeh 'ink'ez 'ilħuz

* **9:9** Ndi khunek “Neyuh ts'ih huwa t'ets'oninzun”, 'i hoonli ts'ih'un na'a k'uś tink'us 'uhoont'ah, 'i għa t'ets'oninzun, ts'utni ho' ts'utni.

wheni, whuz whinya. 'Et ndúja hoh 'ilhuz wheni nenaneonket. ¹³ 'Et ndunnah Moses be' dustl'us bugha dahúja 'et huwa 'aw bun cho su'ai ts'ih 'aw whuz hutoodelh ghat'ah, ndunt'ah musdus dune 'ink'ez sheep bubuzkai buk'ehídelht'ih. 'Ink'ez musdus hidélhk'un, 'i bulez 'i buk'unuhítedzih, 'et whuz na'a Yak'usda nalh buyust'e 'aw chaditsun nahúdlih. 'Et whuz na'a 'et nduhúja t'eh bun cho su'ai, 'i whuz hutedulh. ¹⁴ 'Et whunts'ih Christ 'en dich'oh duduzkai, 'i be 'o nus dahóolcho hoh neyuh ts'ih bugha t'ets'oninzun, 'i 'et ts'iyawh neba whuna'alhde. Ndai 'uts'ulh'en, 'i 'aw nela 'oot'en ghat'ah, 'ants'i 'et 'ohoont'ah. 'Et huwa Yak'usda, 'en buba né'ts'oot'en huba' hoont'ah. Christ 'en 'uja 'aw hoonliyaz bulh chadí'ah hoh Ndoni ndun 'ilhuz whuts'un khuna, 'en be Yak'usda yutl'a'dudelti, neba datétsah ka. ¹⁵ 'Et huwa ndi k'an khunek neba lhaídinla, 'i 'et Christ 'en hubéguz neba unli. 'Et whuz na'a ndunnah njan 'udechoo khunek huba lhaídinla, 'i 'et hukw'úne' whút'en hukwa 'uhet'en, 'et whunts'ih lubeshi 'uhalh'en, 'en ts'iyawh lhdulalhgus k'ut huba dazsai 'et hoh njan 'udechoo khunek huba lhaídinla, 'i bugha lubeshi neba whulanaoodetnik huzdli. 'Et hoh ndunnah 'ilhuz wheni hudutejih ka hubuka'dani, 'en ndi k'an khunek huba lhaídinla, 'i hiyóolhchoot ka.

Dune hoonli khunek huba lhaídinla, 'en dune dazsai, 'et zeh buts'i tékulh

¹⁶ 'Et dune hoonli khunek huba lhaídinla, 'en dune dazsai, 'et zeh buts'i tékulh, whuz na'a 'ohoont'ah. ¹⁷ 'Et whunts'ih ndi khunek ba lhaídinla, 'i khuna whutah, 'et 'awhuz bube'ildzun unli ho' 'int'ah. ¹⁸ 'Et whuz na'a 'ohoont'ah,

hoh da 'udechoo hoh Yak'usda ndi 'udechoo khunek huba lhaídinla, 'et Yak'usda bukw'uzdai k'ut 'ink'ez dune buk'ut chah, Moses 'uskai be buk'eídilht'ik. ¹⁹ 'Et Yak'usda bughunek Moses yutl'aída'ai, 'i nts'e na'a 'uwhúlhni, 'et hubugha ts'iyawh Moses hubudáni. 'Et hukw'elh'az mus-dusyaz 'ink'ez sheep bubuzkai too bulh 'int'ah, 'i yílhchoot. Sbai bugha dulk'un, 'i duchunyaz 'i hyssop hiyúlhni, 'i buzooschum, 'i yulaídalh'oo 'ink'ez ndi 'uskai yé tunayuzsi 'ink'ez Yak'usda be' dustl'us yuk'uné'delht'ik 'ink'ez dune chah, ts'iyawh buk'uné' delht'ik. ²⁰ 'Et ndoh búlhni, "Njan ndi 'uskai 'i be Yak'usda khunek nuhwhuba lhaídinla," ni Moses. ²¹ 'Ink'ez ndi bun cho, 'i chah, 'ink'ez tuz ts'ih ndai Yak'usda bé ba 'uwhut'en, 'i 'int'ah, 'i chah ts'iyawh, ndi 'uskai yuk'unídelht'ik. ²² 'Et Moses be' dustl'us 'i be 'ankw'us ts'iyaintsuk 'et ndi 'uskai 'i be whuz na'a chaditsun nahudleh. 'Et 'aw 'uskai buk'échadulht'ih t'eh, 'aw hubulubeshi ba hubuna'oodeh ghait'ah.

Christ 'ilhuh zeh neba dazsai dáhoolcho ho' hoont'ah

²³ 'Et huwa ndi yun k'ut hoonli, 'i ndi ts'iyawh yak'uz sula, 'i ndult'ah ho' 'int'ah. Nts'e na'a Moses dát'en, 'et whuz na'a chaditsun suli. 'Et whunts'ih soo yak'uz ts'ah'un 'int'ah ndai 'et 'int'ah, dutsun wule whuch'a, 'i 'o nus hoonzoo be huwat'aih, hóle huba' hoont'ah. ²⁴ Christ 'en ndi yun k'ut njan bun cho bet, ndet k'us whúdezti, dune bula be 'uhuhóonla, 'aw 'et dachayal. Njan 'et 'ants'i yak'uz whunduwht'en huwhulhtsi 'et huwa. 'Et k'us nduk yak'uz ts'ih whuz whenya. 'Et whuz na'a Yak'usda but neba nenínya. ²⁵ 'Et njan náwhulnuk

degha nus dezti, 'en khunai buzkai be, naoodezulh totsuk, njan degha nus whudézti, whuz k'unádaih. 'Et whunts'ih Christ 'aw dich'oh lhat cho huwá dudóltelh huba cha'hóot'ah. ²⁶ 'Et ndúja t'eh, ndi yun 'ulya da whuts'un, k'an 'et whuts'un, 'et t'eh tube lhat da daootsah wule. 'Et k'an 'aw 'et ndi yun 'ustl'e' 'utenilh nilhdukw whuzdli, 'et 'ilhuh zeh ndi yun k'ut nusíya, 'ink'ez neba huwa' dudulti. 'Et huwa whuz na'a nelubeshi neba yunaoodelhúnah. ²⁷ 'Ink'ez dune 'ilhuh zeh dahútetsah, whuz na'a 'uhóolya, 'et dahúzsai hukw'elh'az 'et t'eh huba nahutedeh. ²⁸ 'Et whuz na'a Christ, 'en 'ilhuh zeh huwá' dudulti. 'Et whuz na'a lhanah hubulubeshi hubughu yílhchoot 'i yuk'elha dazsai. 'Et whunts'ih whulh nat, 'aw lubeshi bugha ilah hoh whusanatedalh. 'Et k'us ts'iyanah ndunnah tube buka tsi hooli, 'en hubunalhts'et be hóoduteltsilh, 'et hudutejih.

10

Khunai Yak'usda bukw'uzdai k'ut hídelhk'un, 'i be 'aw hubulubeshi hubuna'doodeh ghaft'ah.

¹ 'Et Moses yuk'e'ánguz dalzoo, 'i whuz hatekulh, 'et 'aw soo cho nduchanedinil. Ndunnah ndi khunek yuk'une' 'ust'en, 'en naooduzuk totsuk ndai huwa t'aih Yak'usda bukw'uzdai k'ut hidutélk'un, 'et whunts'ih 'aw Yak'usda nalh lhadulya uboolhtsilh ghaft'ah. ² Lhadulya hubutelhtsilh t'eh, ndai huwa t'aih, 'ustl'e' hiyooleh huba' hoont'ah. 'Et doo chah hubulubeshi ts'iyawh ba hubuna'dede t'eh, 'et sih buyuh ts'ih bugha t'ets'oninzun, 'i be t'ewhunteezeh. ³ 'Et whunts'ih naoodezulh totsuk, ndai huwa t'aih, 'i be 'et hoh ts'iyawh t'ehonínzun

'awhuz lubeshi hit'i. ⁴ 'Et musdus dune 'ink'ez sheep buzkai, 'i nts'oh dáhoont'ah 'et whunts'ih hubulubeshi 'aw 'i be hubuna'doodeh ghaït'ah 'et huwa.

Christ buzkai 'i be zeh nelubeshi yuna'alhde

⁵ 'Et huwa nkeda Sizi Gri ndi yun k'eínya hoh, 'et njan ndutni,

"O Yak'usda ndai huwa t'aih
'ink'ez Yak'usda bukw'uzdai k'ut hidélk'un,
'i ts'iyawh buka cha'nínzun.

'Et whunts'ih 'ilho yust'e 'i suba lhadinla.

⁶ Ndai Yak'usda bukw'uzdai k'ut lubeshi ba dézk'un,
'ink'ez 'et 'uyoo huwa hiyulih, chah,
'i ts'iyawh 'aw mba soo cha'ildzooh.

⁷ 'Et huwa 'et njan dídusni,

'O Yak'usda ndi dustl'us sugha 'uk'une'zínguz 'et
'alha 'ohoont'ah.

Nyun hukwa' ninzun k'una'a tune'test'en, 'et
huwa whusaíya."

⁸ Njan ndutni hoh 'utni, "Ndai Yak'usda bukw'uzdai k'ut lubeshi ba dézk'un, 'i 'ink'ez 'et 'uyoo huwa hiyuli inle chah, 'i ts'iyawh 'aw mba soo cha'ildzooh," 'et whunts'ih Moses be' dustl'us 'i bugha 'et nduwhut'en inle. ⁹ 'Ink'ez Sizi Gri njan chah ndutni, "O Yak'usda nyun hukwa' ninzun k'una'a tune'test'en 'et huwa whusaíya." 'Et whuz na'a Yak'usda njan 'udechoo khunek huba lhaídinla, 'i hoolah yulhtsi. 'Ink'ez bulh nankoh khunek huba lhaídinla, 'i yuk'enaída'ai. ¹⁰ 'Ink'ez Yak'usda ndet hukwa' ninzun, 'et hoh 'ilhuh 'ink'ez 'ilhuz wheni Sizi Gri buyust'e be neba huwa' dudulti. 'Et whuz na'a 'uda bube'ildzun ts'uzdli.

*Christ neba dazsai, 'et 'i be ndunnah 'utahalya,
en ts'iyanah lhahúdulya hubulhtsi*

11 'Ink'ez ndi Yak'usda bukw'uzdai k'ut hidélhk'un, 'et dzin totsuk 'i zeh ndunnah náwhulnuk whusayulih. 'Ink'ez 'et whuz na'a zeh dune huba ne'hut'en. 'Et whunts'ih 'et nduhút'en 'aw hubulubeshi hubuna'doodeh ghaít'ah. **12** 'Et whunts'ih Sizi Gri nelubeshi k'elha 'ilhuh zeh 'ink'ez 'ilhuz wheni 'uja dich'oh huwá' dudulti. 'Et hukw'elh'az Yak'usda nalhnih ts'ih yughu nátl'adeda. **13** 'Ink'ez k'an 'et 'et usda nket'ah 'uwhutenilh hoh yuch'a detni, 'en 'ants'i neke buk'ut nályis, 'i k'una'a duke yuh nébutelelh, 'et huba ulh'i. **14** Ndunnah Yak'usda ba 'udun nibuninla, 'en huba Sizi Gri 'ilhuh zeh huwa dudulti, 'i be 'ilhuz wheni lhadúlya ts'uzdli. **15** Ndoni 'en chah whuz na'a 'et ndunélhni. Hoh da 'et ndutni,

16 "NeMoodihti njan ndutni,

"Et hoh dzin hukw'elh'az ndi khunek huba lhaídusdleh,
'i 'uyoo 'int'ah. Sk'ah ts'ih budzi yuh chah newhudutes'ah
'ink'ez bubeni tah chah 'uk'e'tesgus."

17 Hubulubeshi 'ink'ez 'uk'únuchá'hust'en,
'i ts'iyawh chah 'o 'un huba whunaoolhúnih ghaít'ah."

18 'Aw 'et ndai nelubeshi ts'iyawh neba whunaodelhúnah, 'ink'ez 'aw 'o 'un nelubeshi ba 'udóolk'un ghaít'ah.

Sizi Gri neba daja, khun teh neba nawh 'uhot'e gunih 'ink'ez soo cho ts'uhotun

19 'Et huwa sulpatsinkah, Sizi buzkai bugha tube nedzi hoonli hoh ndet degha nus whudézti

ts'ih 'ahoolhyez whuz uztedulh, 'et netl'ahó'ai.
²⁰ 'Et ndi ti, 'i k'ahoondit, 'ink'ez ts'ah'un na'a 'int'ah, neba whulhtsi. 'Et dich'oh neba dazsai, 'et 'i be ndi whuts'oh hukwadelhchooz, 'i neba lhch'a yilhchoot. ²¹ 'Ink'ez Yak'usda bukoo húdelhts'i, 'en huba 'en náwhulnuk degha nus dezti unli.
²² 'Et huwa nuwheni chah soo cho neba 'alha 'oot'e 'ink'ez nedzi ts'ah'un 'int'ah, 'i be whuz na'a 'ahoolhyez buts'úztooya. 'Ink'ez buzkai be 'uda nedzi k'únidelht'ik. 'I be ndet neyuh ts'ih bugha t'ets'oninzun, 'i whudutsun, 'et ts'iyawh neba whuna'ahlde. 'Ink'ez neyust'e too unzoo, 'i be toonáyuzguz li'ts'oot'e. ²³ Ndet buka tsi ts'úhooli, 'et neba 'alha 'ohoont'ah ts'utni, khun teh neba nawh huhot'e gunih 'ink'ez soo cho ts'uhotun. Nduñ nets'úhoozi, 'en 'aw nela dootnih ghat'ah 'et huwa.
²⁴ 'Et ts'iyawh lhghu nuní uznoozut 'et t'eh nus lhts'un noolt'uk, 'et t'eh ts'iyanañ hubuk'ets'ootsi' 'ink'ez 'ut'en unzoo, 'i be hubula' ts'oot'en. ²⁵ Nts'e na'a 'ahoolhyez 'ilhunats'owúdulh khun teh whulazdootnih gunih! 'Et bulunah 'ustl'e' hut'ih. 'Et whunts'ih 'aw 'et degha nus dzin whuz de whélts'ulh 'aw 'et neba nilhdukw suli. 'Et huwa 'o nus soo cho nus lhts'unoolt'uk hoh 'ahoolhyez Yak'usda ba 'ilhunats'owódelh huba' hoont'ah.

Ts'ah'un na'a 'int'ah, 'en be 'alha 'ohoont'ah, 'i be ndi yun k'ut hudóolts'i

²⁶ 'Et huwa 'udusni, khunek 'alha 'int'ah t'ezninzun hoh ts'iyawh ts'ilhchoot, 'ink'ez hukw'elh'az ts'ah'un na'a t'ets'onanzin t'eh, 'et whunts'i 'aoonilhka lubeshi ts'ilhchoot t'eh, 'et nduts'út'en, 'aw be huwá t'aih, 'i neba chaít'ah suli. ²⁷ K'us njan ndet neba nahutedeh, 'et wheoonujut

k'et 'aw uzdooni għait'ah. Yak'usda ye hunilch'oh, 'i be neba nahutedeh. Ndi ye hunilch'oh, 'i kwun ulhtus k'et 'i be dulk'us li'utni, 'i k'una'a ndunnah Yak'usda ch'a detni, ts'iyawh 'i be huduték'un.

²⁸ Ndi Moses be' dustl'us k'ut 'uk'e'eduguz, 'i ndan n'un whutulħdelħ, 'en nanah k'us tanah nahl 'et duħut'en t'eh, 'et t'eh be 'ugha te'nidzeh, 'i bu'et dahūtetsah inle. ²⁹ 'Et ndez na'a 'o nus whutétsi'. Ndunnah Yak'usda buYe' 'ants'i yuba unli hoh yuk'unuya t'eh, 'ink'ez Sizi buzkai be k'an 'et khunek huba lhaídinla, 'i huwhut'i, 'et Yak'usda ba 'udun nioobuninla, 'et whunts'ih ndi buzkai 'aw hoonliyaz huba chaílah t'eh, 'et Ndoni 'en chah, 'en be ye unzoo, 'i buts'un haídupts'uk, hich'a yalhtuk t'eh, 'et ndi ts'iyawh ndunnah whuz na'a nduhut'en, 'et 'o nus whéoonujut hoh huba nahutedeh. ³⁰ 'Et neMoodihti, 'en buk'ah ts'ih t'ets'oninzun. 'En 'utni, "Ndi be k'uznudzun, 'i si zeh hukw'elha whutelhsilh." 'Ink'ez chah 'utni, "NeMoodihti dudune, huba nahuteyeh." ³¹ Yak'usda khuna, 'en ndunnah hubuzkeh hinli 'et whunts'ih hich'a nalhúya t'eh, 'en wheeoñujut hoh huba nahuteyeh. ³² 'Et whunts'ih nuhwheni whunalhúnih ndi khunek niz dakez daja hutni, soo cho t'eeonáhzun 'ink'ez ulħchoot. Hukw'elh'az tube cho dzuh nusahdeh 'et whunts'ih 'aw nuhwhuch'a cha'ilhdoh. 'Et ts'iyawh 'aw whecháhtsaz hoh whutah lhusáħdel.

³³ Whulutah Yak'usda bughaq ts'ianah nahl dzuh nunóhuhulħdeh 'ink'ez nuhch'a yahalhtuk. Whulutah ndan whuz na'a Yak'usda dzuh nuhudeh, 'en buts'ú nidahyih. ³⁴ Hoh da tsak'esuhan'ai hoh sugħaq te'nahżun 'ink'ez sula 'aħtent inle. 'Et ndai aħt'i, 'i 'ants'i nuhghu

hiyílhchoot 'et whunts'ih hoonáht'i. T'eeonáhzun
nuhwhenich'oh 'o nus hoonzoo 'ink'ez 'ilhuz
'ohoont'ah, 'et yak'uz nuhwhuba whuzdla ho'
hoont'ah. ³⁵ 'Et huwa be nuhdzi ulhtus khun
whuladoohtnih gúnih! 'I bugha hooncha nuhgha
whutelts'ulh. ³⁶ 'Et njan 'et ts'iyawh bula doohtnih
gunih! 'Et Yak'usda nuhts'u hukwa' ninzun,
lhaoodahla t'eh, 'et nuhts'u nahezya, 'et nuhgha
óotekulh. ³⁷ 'Uda khunek 'et njan ndutni,
"Et ndun whusatéyah, 'aw sa ilah whusatéyah.

³⁸ 'Et ndunnah ts'ah'un na'huja,
'en be 'alha 'ohoont'ah,
'i be hukhutena huba' hoont'ah.
'Et whunts'ih ndunnah k'ah na'huja t'eh,
'aw si huba hóst'i ghait'ah."

³⁹ Ndunnah dune Yak'usda huba 'alha' yint'ah
'ink'ez k'ah na'huja t'eh, 'en ndai Yak'usda bugha
whúte'ah, 'aw hiyóolhchoot għait'ah. Nuwheni
'aw 'en hubuk'una'a cha'ts'ít'ah. 'Et k'us nuwheni
Yak'usda buba 'alha' yint'ah ts'inli, 'et hoh 'uzdujih
'uts'int'ah.

11

*Be 'alha 'ohoont'ah, 'i be Yak'usda be 'ut'en k'ah
nt'ets'onínzun*

¹ 'Et ndai buka tsı ts'uhóoli, 'i be 'alha 'ohoont'ah,
'i be t'ets'onínzun neba whusaootékulh. 'Ink'ez
ndi ndet chats'uwhes'en, 'et whunts'ih be 'alha
'ohoont'ah, 'i be t'ets'onínzun 'et whuzíla ho'
hoont'ah. ² Ndi be 'alha 'ohoont'ah, 'i be ndunnah
Yak'usda ba 'utsuh whudélhdzulh, 'en soo ts'ah'un
na'a howu yahalhtuk. ³ Be 'alha 'ohoont'ah, 'i
be zeh t'ets'onínzun Yak'usda daja ni, 'et hoh
ts'iyaintsuk ndi yun k'ut 'ulya. Ndai chats'es'en,

Hebrew Khunek K'uyahalhtuk 11:4xxxiii Hebrew Khunek K'uyahalhtuk 11:7

'i whunts'i, bughunek 'i be ts'iyawh 'uyinla, 'i 'int'ah.

Yak'usda ndi yun 'uyinla hoh da whuts'un be neba 'alha 'uhoont'ah, 'i bughazeh Yak'usda bunalh ts'ah'un 'uts'int'ah

⁴ Ndun Abel, 'en Yak'usda buba 'alha' yint'ah. 'I be zeh 'uja dulhutsin Cain 'en degha nus unzoo, 'i Yak'usda bukw'uzdai k'ut yuba 'údalhk'un. Ndi huwa íni'ai, 'et Yak'usda hoonzoo k'una'a yughu yalhtuk. 'Et Abel dazsai hukw'elh'az whunts'nts'e na'a daja, 'et bughha nelh yaintuk, Yak'usda nalh 'en ts'ah'un dune 'int'ah hutni. ⁵ Njan be 'alha 'uhoont'ah, 'i be zeh Enoch nts'e na'a Yak'usda yuts'u hukwa' ninzun, 'et 'uhóonla 'et whuz na'a bughha t'ewhunúdzun. 'Aw dachaitsal. Khuna hoh Yak'usda yak'uz wheyalhti. 'Et whuz na'a Yak'usda bughunek 'et ndutni, "Yak'usda yak'uz ts'ih whenáyalhti. Hoolah. 'Et huwa hiyulh 'uhut'en 'aw chahiyés'en suli." ⁶ Bé 'alha 'uhoont'ah, 'i bu'et t'eh, 'aw Yak'usda buba dzuh ts'oozoo ghat'ah. 'Et huwa ndunnah Yak'usda ts'un hutedulh hukwa' huninzun t'eh, Yak'usda hoonli ho' hoont'ah, 'et huba 'alha' hot'e huba' hoont'ah. 'Ink'ez soo ts'ah'un dudzi huwa' hooli hoh hik'ah ts'ih hukwa hítes'en, 'en zeh bula' tenilh. ⁷ Noah 'en chah Yak'usda buba 'alha' yint'ah. 'I be ndet 'aw chawhes'en whúnts'i, ndet Yak'usda 'uyúlhni, "Huwondle 'aw 'et whuz de whélts'ulh." 'Et huwa whenuljut hoh ndi ts'i cho 'i 'uyínla. 'Et huwa Noah hikoo húdelhts'i, 'en ts'iyawh hubúlhyih. Ndet ndi ts'i cho 'uyínla, 'i bughha ndi yun k'ut nduhóolcho hoh dune huba nahesda. Nts'e na'a hoh be 'alha 'uhoont'ah be

ts'ah'un na'a 'int'ah ts'inli, Noah 'en chah whuz na'a Yak'usda buba 'alha' yint'ah suli, 'i be ts'ah'un dune inle.

Abraham buba 'alha 'uhoont'ah

⁸ Abraham, 'en chah Yak'usda ndi yúlhni, "Udun yun k'uz tonya. K'at lih t'eh njan yun k'ut 'et nye'hoolhdzun whutele." 'Et be 'alha 'uhoont'ah be Abraham whuz na'a yuk'úne' 'ust'en. 'Et nts'e teyalh 'aw nt'éoonízun 'et whunts'ih 'aw 'et tezya. ⁹ Be 'alha 'uhoont'ah, 'i be ndi yun yuts'u yoozi, 'i bube'hooldzun tele. 'Et njan yun k'ut 'uts'un keyah whut'en unli, 'et whuz na'a njan yun k'ut usda. Bun bet zeh whut'i. Ndunnah Isaac 'ink'ez Jacob 'en chah 'en k'una'a bun be zeh huwhut'i. 'En chah ndi Abraham ye yuts'u náhezya, 'en bulh bube'ildzun whutele. ¹⁰ 'Et njan keyah 'ilhuz 'uwhutet'ilh, 'et Yak'usda, 'en 'uhóonla, 'et Abraham huba ilh'i hoh bun be zeh 'ant'e inle. ¹¹ Be 'alha 'uhoont'ah, 'i be Sarah 'en chah Yak'usda ye ulhtus, 'i yutl'anaho'ai wulchan ka. Tube ye 'un uzulh 'aw buyaz hóle buba cha'hóot'ah. 'Et whunts'ih nts'e na'a Yak'usda yuts'ú hoozi, Sarah nt'éooninzun Yak'usda 'aw yula dootnih ghat'ah. ¹² 'Et huwa 'ilhunuh dune, 'en tube hoonyan k'et 'ants'i dazsai li'int'ah, 'et whunts'ih yé dinde hulai. Nduk sum 'et 'i bundíneltsuk 'ink'ez taba sai, 'i 'aw oodólto ghat'ah, 'et 'uhuneltsuk.

Ndunnah 'uda Yak'usda huba 'alha' yint'ah, 'en ts'iyawh 'awhuz huba 'alha 'uhoont'ah hoh whulh yahadla

¹³ Ndunnah 'uda Yak'usda huba 'alha' yint'ah, 'en ts'iyawh 'awhuz huba 'alha 'uhoont'ah hoh

whulh yahadla. 'Et ndai Yak'usda yé buts'ú na-hezya, 'i 'aw butl'acháyizulh. 'Et whunts'ih ndai nus huho'en, 'et huwa 'aw nawh huba cha'hóot'ah. Hubudzi hóont'i hoh huhoontun. 'Ink'ez ts'iyanah 'uhutni, 'aw ndi yun k'ut whut'en chahílah. 'Ants'i ndi yun k'ut whuk'uhundelh ho' hint'ah. ¹⁴ 'Et dahutetsah whutsuh ndunnah whuz na'a yalhtuk, 'en soo ts'et gaih hoh ts'iyanah wheoobuhonulh-tun, hedich'oh hubuyun k'ut 'et zeh hukwa' hun-inzun. ¹⁵ 'Et 'alha ndet yun k'ut whuch'a huzdel, 'et howu nuní hunudeh t'eh, 'et whuz nahutoodelh wule da. ¹⁶ 'Et whunts'ih 'o nus keyah hoonzoo hukwa' huninzun. Njan keyah 'uwhúlhni, 'et yak'uz whuz'ai. 'Et huwa Yak'usda 'en neYak'usda hidáni. 'Ink'ez Yak'usda 'en neYak'usda hiyulhni, 'en 'aw hukwaya chailah, keyah whuti 'et huba lhaóodinla 'et huwa.

Israel hitsuh dedowh, 'en ndi be huba 'alha 'uhoont'ah

¹⁷ Be 'alha 'uhoont'ah, 'i be hoh da Yak'usda Abraham yóolhdzai hoh 'aw 'ilhunuh buye' Isaac Yak'usda bukw'uzdai k'eyilhti 'ink'ez Yak'usda ba yutuzelhghelh ka. Ndet Yak'usda yuts'ú hoozi hoh buye' buts'ah hainde huteldlai, 'et ts'iyawh hóolhchoot. ¹⁸ 'Ink'ez whutsuh 'uja 'en Yak'usda Abraham yudáni, "Isaac 'en bugha nyédinde 'en ts'iyawh whusahátedulh." ¹⁹ 'Et whunts'ih Isaac, 'en Yak'usda bukw'uzdai k'eyítelhtelh whutsuh Abraham whunalnik Yak'usda daja yudáni. 'Et huwa 'et dunínzun, Yak'usda 'en soo 'últus hoh Isaac dazsai t'eh, 'et whunts'ih yahadla tah dinaidutélhtilh. 'Ink'ez 'alha 'uhoont'ah, yahadla hanáyalhti li'yinla. ²⁰ 'Ink'ez be 'alha 'uhoont'ah,

'i be ndet ts'iyaintsuk whusaóotekulh ka, Isaac, 'en Yak'usda yoodalhkut, ndunnah Jacob 'ink'ez Esau bulh buts'un wúzoo ka. ²¹ Be 'alha 'uhoont'ah, 'i be Jacob dawhénintsai hoh Yak'usda yoodalhkut Joseph buye'kah buts'un wuzoo ka. 'Et dutuz nichandunuti hoh Yak'usda ts'un teni' nalhdzin. ²² 'Ink'ez be 'alha 'uhoont'ah, 'i be Joseph 'aw 'et buyiz lait'ah whéninle hoh Israel whudune Egypt yun k'ut whuch'a nahutedulh hoh hubugha hubulh yaílhtuk. 'Ink'ez buts'un 'i chah dahítelih, 'et hubudáni.

Moses buba 'alha 'uhoont'ah

²³ Hoh da Moses whuzdli, 'en ski daldzoo, 'et huwa be 'alha 'uhoont'ah, 'i be be'abá 'ink'ez be'ama chah, hubudayi cho daja ni, 'aw hik'una'a cha'nil, 'et k'us tat sanun nduhólyez 'et be'abá 'ink'ez be'ama 'et nuhínulh'i. ²⁴ Moses 'aw 'et k'enényi hoh Pharaoh butse', 'en buyaz hiyúlhni, 'et be 'alha 'uhoont'ah, 'i be nduhíyulhni 'ilhuz ch'a oobunésjoot. ²⁵ 'Et k'us Yak'usda, 'en bulh tube lhat hoontsi' dzuh notezut, 'et whuz na'a Moses 'utahahó'ai. 'Astl'iyaz lubeshi be hootét'i, 'aw 'et ilah 'utahahó'ai. ²⁶ Christ 'en bugha ndunnah Egypt whut'en, 'en Israel hits'uh hainde hubuch'a yahalhtuk. 'Et Moses njan duninzun ndi buch'a yahalhtuk, 'et Egypt whuhubdayi cho daneletsuk sooneya, 'i ts'iyawh ba nus yinzoo ho' 'int'ah. Yak'usda, 'en nts'e na'a hoh hube'ildzun huba k'elhla whutele, 'et huba neóoni'ai, 'et huwa 'et ndúhoont'ah zeh Moses hukwa ités'en. ²⁷ Yak'usda chast'en, 'en whuz na'a 'ants'i ya'en hukw'u na'a 'uja, 'et huwa huba howa whulna whechaítsaz. 'Et huwa be 'alha 'uhoont'ah, 'i be yun k'ut

Egypt whuch'a nasja. 'Aw hubudayi cho ye yulh hunilch'e, 'i Moses 'aw yé chaniljut. ²⁸ Be 'alha 'uhoont'ah, 'i be Moses ts'iyaintsuk Yak'usda k'une' 'ust'en. 'Et huwa ndet koo 'uskai be hoodel'en, 'et lizas whutus lhuseya. 'Et huwa koo 'uskai be wheoodutet'en, 'udechoo huwhuzdli, 'en ndun lizas buzoolhghelh ghait'ah. ²⁹ Ndi ya too dulk'un, 'i Yak'usda huba lhch'a 'úyinla 'ink'ez yun whudezgi hoh be 'alha 'uhoont'ah, 'i be hik'ut naníndel. 'Et Egypt ba nehughan, 'en chah huba huntezdel hoh ts'iyawh too hubanghan.

'Uda lhanah huba 'alha 'uhoont'ah, 'i be whuch'a' honílhde

³⁰ Be 'alha 'uhoont'ah, 'i be Jericho keyah 'et skwunlai 'o 'at nat dzin 'et whunahudedulh hoh khunyaz hukw'elh'az ndi tse dutai, 'i whunasá'a, 'i nanánkat. ³¹ Be 'alha 'uhoont'ah, 'i be ndun ts'eke 'ul'en, Rahab hiyúlhni, 'en ndunnah Moses ba nunúl'i, 'en bula' tenilh ka bukoo dá buninla. 'Et huwa ndunnah Yak'usda k'unucha'ust'en, 'en 'aw hubulh dachaitsal. ³² 'Aw 'et njan lhe'whultsuk be 'alha 'uhoont'ah k'une' hust'en, ndunnah hulai k'et 'aw ts'iyawh hubugha nuhwhudóosni ghait'ah. Gideon ndet 'uhóonla. Barak 'en chah. Sampson, Jephthah, David, Samuel, 'ink'ez nus whunilh'en, 'en ts'iyawh, ³³ be 'alha 'uhoont'ah, lhelhdun keyah whut'en, 'en chah ts'iyawh buch'a' hunilhde. Ndet ts'ah'un na'a 'uhoont'ah, be 'alha 'uhoont'ah, 'i be 'uhuhóonla. Ndet Yak'usda buts'ú hoozi, be 'alha 'uhoont'ah, 'i be bube'ildzun whutele t'ehoninzun. Be 'alha 'uhoont'ah, 'i be Yak'usda ndi khunaiti, lion hiyúlhni, 'i hizek lhts'una' hoonla hubundóolhdah whuch'a. ³⁴ Be 'alha 'uhoont'ah, 'i be kwun

dez'k'un, 'i chah nahinelhno. Yak'usda ch'a hudemni, 'en tes cho be hubuhuteghan inle, 'et whunts'ih be 'alha 'uhoont'ah, 'i be buch'a hudemji. Lahít'ah 'en chah 'i be ulhtus nahusdzi. Lhuhutedúghan ts'ih hutezdel hoh 'et chah be 'alha 'uhoont'ah, 'i be hilhtus suli. 'Et whuz na'a hubulh lhúhudughan, 'en chah hubube oonújut hiyida'ai 'et whuz na'a whenábuhunanyoot.

³⁵ Be 'alha 'uhoont'ah, 'i be bulunah ts'ekoo bughu yahadla chah zeh dinahudidel 'ink'ez bughu nahundel. 'Ink'ez 'uyoon chah dzuh nubuhulhdeh, 'et whunts'ih be 'alha 'uhoont'ah, 'i be zeh hedich'oh 'aw hubula nahudutetnih hukwa cha'hunízun. 'Et 'o nus hoonzoo hukw'u na'a dinabudutélelh 'et nahohooté'alh. ³⁶ 'Et 'uyoon, 'en bughu hedlo 'et hoh hubuhóolhdzai, 'Et bulunah hubuhoolhtas. 'Ink'ez bulunah tl'oohl be hubuhulhghel 'ink'ez tsak'ebuha'ai.

³⁷ Bulunah tse be hubuhanghan. Bulunah dugwut be buyust'e tánuhidetzghut. Bulunah chah tinta' hutet'ilh whuts'un bonalht'uk. Bulunah tes cho be hubuhanghan. 'Ink'ez bulunah ndai khunai zuz, sbai teh, sheep teh, 'i ts'iyawh lhelyoo zuz 'i zeh be dune hinli. 'Ink'ez 'ants'i hoh nuhadelh. Hik'u khúténa, 'i whunts'i chahuyít'i inle. Dune dzuh nobuhulhdeh. Lhat hoh hoontsi' k'una'a ne'bahalh'en. ³⁸ 'Et ndunt'ah 'aw ndi yun 'i whunts'i huba soo cha'yildzooh. 'Aw dune chahóot'ih 'ink'ez dzulh tah hoh lhelhts'un náhutudulh. Tse 'an teh k'us yun 'an teh, 'et huwhut'i. ³⁹ 'Et ndunnah ts'iyawh be huba 'alha 'uhoont'ah, 'et huwa hoonzoo k'una'a bughi yaintuk. 'Et whunts'ih ndet hubuts'u hoosdzi, 'aw butl'acháhoozulh. ⁴⁰ Whuz na'a nuwheni ts'iyawh nús t'eh, Yak'usda 'o nus hoonzoo

neba' 'uhóonla. 'Et whuz na'a ndunnah ts'iyawh nuwheni ts'uholah t'eh, ndet hoh Yak'usda buts'u hoozi, ne'et 'aw ts'ah'un na'a lhadúlya hoole ghat'ah.

12

Neba 'alha 'uhoont'ah, 'i be lhghu naztoolghas

¹ 'Et huwa ndun whudutésnilh, ndunnah hubugha 'un whudani, 'en Yak'usda be 'ut'en k'ah whunéhunulhtun, 'en hulai k'et, nenat nduhóolcho 'ants'i kw'us li'hint'ah. 'Et huwa ndai neba ndaz, 'i k'ah nenilht'uk, 'i 'ink'ez ndi lubeshi 'aw huwa chahoolna hoh nélhghel, 'i ts'iyawh 'un uztoolhdelh. Ndi Yak'usda ba lhghu naztulwus, 'i neba níwhults'ut hoh howa wulnah whunts'i soo cho whulh ts'ooyin hoh uztoolghas. ² Netsuh ts'ih Sizi Gri uznoolh'en. 'Aw 'en zeh neba bé 'alha 'uhoont'ah dant'ah, 'en ts'ah'un na'a whunéulhtun 'int'ah. 'Ink'ez ndi yun k'ut usda, 'et ye khuna, 'en nduhóolcho hoh neba 'alha 'uhoont'ah neba lhaoodulh'ih 'int'ah. Nus de ye whúntelhnik, buts'un yékulh, 'et whunts'i lhdulalhgus yulh ínyin inle. Ndai yugha hooya suli, 'i huba 'ants'i 'uhoont'ah inle. 'Ink'ez Yak'usda bukw'usúda cho dezti, 'et nalhni ts'ih nátl'adeda.

Yak'usda khunek yé nelh yailhtuk, 'i khun teh 'ants'i nuhwhuba 'oot'e gunih

³ 'Et Sizi daja 'et soo cho hubugha nuní noohzut. 'Et ndunnah lubeshi 'ulh'en, 'en ts'iyawh hich'a detni, 'et whunts'ih soo whechaítsaz. Nuhwheni chah ts'iyawh 'en zeh bughu nuní nahdeh t'eh, 'et 'aw ninoohtsilh ghat'ah 'ink'ez 'aw lait'ah wahle

Hebrew Khunek K'uyahalhtuk 12:4 xl Hebrew Khunek K'uyahalhtuk 12:10

ghait'ah. ⁴ Nuhwheni lubeshi ch'a ne'aht'en, tube
nuhwhuba huwa whúlna 'et whunts'ih 'aw hukw'e
yachazahdla. ⁵ 'Et Yak'usda khunekti be buye'kah
k'una'a nohwhulh 'et whunaoodelhúnah. Ndez
na'a nuhMoodihti 'ún whúlhni,

"Suye'kah ndi khunek be nohwhulh yalhtuk, 'i
'ants'i wúlh'i gunih.

Ndet tinta' aht'ih hukwa' nuhwhúlhni t'eh,
khun teh nuhwhéyuh 'ustl'e' 'oohneh gunih.

⁶ 'Et ndunnah neMoodihti buk'entsi',
'en ts'iyawh khunekti be hubulh yalhtuk.

Ndunnah buzkehkah hinli,
'en ts'iyawh huboolhtsas."

⁷ 'Et Yak'usda khunek ulhtus, 'i be nohwhulh
yalhtuk, 'ink'ez whulh whecháhtsaz t'eh, 'et
t'eh buzkehkah k'una'a nuhwhunulhyeh. 'Et
ndan dune simba 'int'ah buye' tink'us 'uja t'eh
yuts'ahachahós'al? ⁸ 'Et nuhwheni nehyelh hoh
Yak'usda khunek ulhtus, 'i be nohwhulh yalhtuk
t'eh, 'ink'ez ts'iyawh whuz na'a 'ilhunuh ts'inli
hoh uznezyi, 'et 'aw buk'unucha'zaht'en t'eh, 'aw
nuhwhé'abá hoolah, 'ink'ez Yak'usda buzkeh
chahlah hoh 'aht'ah. ⁹ Njan 'o 'un chah 'ún
whudusni, ndi yun k'ut ne'abákah 'en khunek
ulhtus, 'i be neyulh yahalhtuk 'ink'ez buk'úne'
ts'ust'en. 'Ink'ez Yak'usda, 'en neyégha be'aBá
ts'utni, 'en ne'aBá degha nus dézti 'int'ah, 'en 'o
nus butl'a'úzdudoolyelh ts'ah'un na'a ndi yun k'ut
uzdutelts'ilh huba. ¹⁰ Ndi yun k'ut ne'abákah
'astl'iyaz zeh hubulh 'uts'int'ah, ndet degha nus
neba hoonzoo, 'et t'ehoninzun, 'et whuz na'a
khunek ulhtus, 'i be nehunelhyi. 'Et whunts'ih
Yak'usda ne'aBá, 'en ndet 'ilhuz wheni neba

whutezoo k'un'a'a khunek ulhtus, 'i be nelh yailhtuk. 'Et 'en k'un'a'a 'o 'un lubeshi neghu hoolah ts'oole ka. ¹¹ Nts'e na'a ts'ah'un na'a khunek ulhtus, 'i be nelh yaintuk hoh uznezyi, whulutah teh whuts'uzdutnik, 'et whunts'ih hukw'elh'az 'et whuz na'a uznezyi t'eh, 'et t'eh soo ts'ah'un 'int'ah dune uztele hoh Yak'usda nahl ts'ah'un na'a lhts'un uztet'ilh.

Yak'usda bughunek khun teh bula doohtnih gunih

¹² 'Et huwa 'ants'i ninéhtsai li'aht'ah hoh nuh-gan naintle 'ink'ez nuhwhugwut chah lait'ah suli t'eh, soo 'o 'un 'oohneh ghaït'ah hoh ulhtus naoolhtsilh. ¹³ Nuhke ba ti chah lhk'odez'a naholhtsilh. 'Et whuz na'a ndunnah nuhtah lahit'ah 'en tinch'a hooya ghaït'ah, 'et k'us soo hilhtus na'hutedle. ¹⁴ Ts'iyanaah ts'un ts'ah'un na'a lhts'un 'ooht'e hukwa' 'ooht'en. Lubeshi bughu hoolah dune wahle hukwa 'ooht'en. 'Et whu'et, 'aw neMoodihti ts'oo'en ghaït'ah. ¹⁵ Soo cho nuhtah nuhwhenich'oh nuhwhulhutsinkah bughohle! Doo ka sih Yak'usda ye unzoo, 'i hiye ghoya. 'Et whuz na'an nduhooja t'eh, 'et bulunah nuhwhutah ntsi' bulh nuni hunuzut wule. 'Et ndihint'ah t'eh, 'et 'en hubugha lhanah ntsi' bulh nuni hunuzut hutele ho' hoont'ah. ¹⁶ Doo ka sih nuhtah bulunah, 'uyoon ts'ekoo k'us dune bulh lubeshi wulhchoot whuts'u nooht'uk. K'us Esau k'un'a'a 'en Yak'usda bughohdloh. 'En 'ude-choo whuzdli 'int'ah 'ink'ez ndai be'abá yuts'u yoozi, 'i bube'ildzun yutele, be'abá nahuyoosdzi, 'i didut buts'itekulh, 'i 'uyinla, 'ilhuh yute'alh zeh k'elha yutez'ai. ¹⁷ T'eeonáhzun hukw'elh'az dáhooja. Ndai hoonzoo yuk'eoote'alh hukwa'

Hebrew Khunek K'uyahalhtuk 12:18xlii Hebrew Khunek K'uyahalhtuk 12:23

ninzun, 'et whunts'ih be'abá yuch'a nalhú'a. Lhat hoh huwintse, 'et whunts'ih 'aw be'abá dudení nahudunoo'ah għait'ah. Nts'oh dát'en whunts'i, 'aw hiba lhk'enaóodoo'ah għait'ah.

Ndunnah yak'uz húdelhts'i, 'en hubuts'un ts'utelwus

¹⁸ Ndez whuz na'a 'un whudóosni hukwa 'ust'en, ndunnah Israel buzkehkah, 'aw 'en buk'una'a ilah hoh ndi dzulh Sinai* dune yut'aghunah, 'et 'aw whuz chatésyal. Ndi dzulh ndulhcho dezk'un, 'ink'ez tsahólhgus cha' hoont'ah. 'Ankw'us 'aw hoonli honoolh'en għait'ah, 'ink'ez nilhts'i dus cho chah hoonli. ¹⁹ 'Et Yak'usda ba be ts'újih, 'i chah hidíts'o 'ink'ez Yak'usda yalhtuk, 'et chah hódants'o. 'Et ndunnah yudánts'o, 'aw 'o 'un hidóots'o hukwa cha'hunizun. 'Et whuz na'a hits'u tedudli 'aw 'o 'at huwhudutéts'o hukwa cha'hunizun 'et huwa. ²⁰ 'Et Yak'usda khunek butl'a ída'ai, 'et 'aw whulh hooyen għait'ah 'et huwa. Khunek njan ndutni, "Khunai whunts'i ndi dzulh yut'agheznai t'eh, 'et t'eh tse be hizóolhghelh, k'us k'aza be hiyooch'ih." ²¹ 'Et huho'en hoh tube wheħħunelhújoot. Moses 'en whunts'i, "Whenlħujut k'et dulħúduz," ni. ²² 'Et ndi dzulh bighaqqa nuhwhuż-dáni, 'aw whuz chatahdulh. K'us ndi dzulh Zion ts'utni, 'i buts'un lhghadahdel. Yak'usda khuna, 'en bukeyah whuti 'uhoont'ah. 'Ink'ez keyah whuti Jerusalem ts'uwhútni, 'et yak'uz whuz'ai. 'Et lizas hulai k'et, 'aw uzdooni għait'ah. ²³ 'Ink'ez ndunnah Yak'usda huba

* **12:18** 'Et 'udechoo khunek nuwhuba l-haidinla, 'I k'ut whunlh'en, Moses dzulh Sinai nusiya inle, ni ho' utni. Exodus 19:21-22, 20:18-21, Deuteronomy 4:11-12, 5:22-27

'alha' yint'ah, ts'iyanah 'ilhunahuwúdulh huba whuz'ai. Ndun 'udechoo whuzdli 'en oosdzi, 'en ndunnah bube'ildzun yinli, 'en yak'uz ts'ih huboozi 'uk'une'úsduguz, 'en chah 'et húdelhts'i. Yak'usda 'en ts'iyanah ba naheyelh, 'en chah 'et usda. 'Ink'ez ndunnah ts'ah'un na'a lhadúlya, 'en hubuyegha, 'i chah 'et 'int'ah. ²⁴ 'Et Sizi ndi k'an khunek neba lhaíndinla, 'en neba hubéguz unli, 'en chah 'et usda. 'Ink'ez ndi 'uskai neba nadélt'ik, 'i be nelubeshi ts'iyawh neba hoolah suli, 'et nts'e na'a Abel yuzelhghi hoh buzkai yun nadélt'ik, 'i 'o nus hoonzoo néwhunelhtan, 'et chah 'et whuz'ai. Ndi ts'iyawh 'et whuts'un whets'elghaz.

Yak'uz whuts'un nelh yailhtuk ts'oozólhts'ai

²⁵ 'Et Yak'usda nohwhulh yálhtuk, 'et hubugha nohwhulh yalhtuk, khun dah doohtni gunih! Whunulh'en, ndi yun k'ut 'et ndúbulhni, 'et whunts'ih 'aw hik'unucha'it'il, 'et huwa hoolhtus hoh huba nahezya. K'an 'et yak'uz whuts'un nelh yailhtuk, 'en buch'a nats'ulhúya t'eh, 'et 'o nus dáwhultus hoh neba nahutedeh. ²⁶ Hoh da Yak'usda hubulh yaílhtuk hoh ndi yun dulduz. 'Ink'ez doo chah zeh nets'ú hoozi hoh njan ndúttni, "Doo chah zeh ndi yun dutelduz. 'Aw 'i zeh ilah, yaz chah ndúhoolcho hoh whudútelduz." ²⁷ 'Ink'ez ndi khunek, "Chah zeh," 'utni, 'et ndez na'a néwhunulhtun, ts'iyai ndai 'ulya, 'i ts'iyawh dutelduz. 'Et whuz na'a dullhuk, 'i hoolah whutele. 'Et ndai 'aw ndoollhuk għait'ah, 'i 'ilhuz wheni 'utet'ilh. ²⁸ Nts'oh huwa hoh nts'e Yak'usda hubudayi cho unli, 'et 'aw nughóotnah għait'ah. 'Et nets'u whutekulh. 'Et huwa ndi ye unzoo, 'i be ts'ah'un na'a hoh Yak'usda, 'en neba dézti 'ink'ez

neba be óonujut, 'en huba ne'ts'oot'en. ²⁹ Nuwheni neYak'usda kwun ts'iyai delhk'un, 'i 'et ndunt'ah ho' 'int'ah 'et huwa.

13

Ndi yun k'ut lubeshi buch'a nasulhúye

¹ 'Ahoolhyez nuhwhulhutsinkah
hubuk'eoohtsi'. ² Ndunnah whutsuh da
chabuzeh'en, hoonáht'i hoh nuhkoo dáboohlelh.
Bulunah lizas tusih 'uhint'ah, 'aw t'eoonuzahzun
'et huwa. ³ Ndunnah Sizi Gri hunedulh 'et huwa
tsak'eoobaha'ai, bunalhúnih 'ink'ez bula 'ooht'en,
'en bulh tsak'edahla lí'aht'ah 'et huwa. Ndunnah
be dzuh neoobahalh'en, 'en chah whuz na'a
nuhwhubeni tah 'obulhdzun. Ts'iyawh 'ilho
yust'e zeh 'uts'int'ah 'et huwa. ⁴ Lhghuzdelhts'i,
'i ts'iyahanah ba' hoont'ah, 'ink'ez whudézti. Lhghu
húdelhts'i whu'iz hoh dukw'usti k'ut dawhut'en,
'aw chahóotsi' ho' hoont'ah. 'Et whunts'ih
ndan 'uyoon ts'ekoo k'us 'uyoon dune bulh
tinta' 'uhut'ih, 'en Yak'usda huba nahuteyeh ho'
hoont'ah. ⁵ Nts'e na'a ndi yun delhúts'i huwahli.
Ndai k'an 'et ahti, 'i 'o nus 'uyoo ka daoohtni
gunih. 'Et huwa neMoodihti njan ndutni,
"Aw nuhghu toosya ghait'ah,
'ink'ez nuhla doosnih ghait'ah."

⁶ 'Et huwa nedzi ulhtus whé 'uzdooni,
neMoodihti 'en nela 'ut'en 'int'ah.
Dune danehulh'en 'et whunts'ih 'aw
chats'unoolhújut.

*Ndunnah lhelhts'un na'a nehóodulh'eh, 'en
buk'ue' 'ooht'en gunih*

⁷ Yak'usda ba 'ilhunahuwúdulh ndunnah
nuhtsuh whudélhdzulh, 'en bunaoolhúnih. 'En

[Hebrew Khunek K'uyahalhtuk 13:8xlv](#)[Hebrew Khunek K'uyahalhtuk 13:15](#)

'uhint'ah Yak'usda bughunek be nohwhulh yáhalhtuk. Nts'e na'a niz dak'ez ndi yun k'ut hudélhts'i da hubulh dáhooja, 'et howu nuní noohzut. 'En hiye 'alha 'int'ah, 'en buk'una'a ne'ooht'en. ⁸ Sizi Gri 'en hulhda, k'an dzin, 'ink'ez 'ilhuz wheni chah, 'et zeh ndunt'ah. ⁹ Lhelhts'un na'a 'ink'ez hoontsi' hukw'u na'a dune hohodulh'eh, 'en huboozólhts'a 'ink'ez buk'une' 'ooht'en gunih. Ndai Lizwif hiya'ah, 'i 'ants'i unli ho' 'int'ah. 'Et ndunnah buk'una'a 'uhut'en, 'aw bula 'uwhudóneh ghait'ah. 'Et huwa ye unzoo, 'i be whuz na'a nedzi yuh dez'ai t'eh, 'aw 'et zeh ts'ah'un 'uhoont'ah. ¹⁰ Nuwheni Sizi Gri buba 'alha' yint'ah 'uyoo Yak'usda bukw'uzdai ts'it'i. 'Ink'ez ndai Yak'usda bukw'uzdai neba k'eínkai, 'i ts'oo'ah huba' hoont'ah. 'Et whunts'ih ndunnah Lizwif ndi yun k'ut bun cho but'ah ne'hút'en, 'aw hiyoo'ah ghait'ah, 'aw whuz na'a butl'achahoots'ulh. ¹¹ 'Et náwhulnuk degha nus dezi khunai buzkai, ndet degha nus whudézti, lubeshi ba 'et whuz dainíkai. 'Et ndi khunai buyust'e, dune whut'i, yoo 'az ts'ih hidélhk'un. ¹² 'Et whuz na'a zeh Sizi keyah whuti whunanesdut'oo dati 'o 'az ts'ih 'et dzuh nuhiyulhdzut. 'Et hoh dich'oh duduzkai, 'i be Yak'usda ba 'udun neninínla. ¹³ 'Et huwa ts'uwhut'i 'o 'az ts'ih, nts'e Sizi Gri 'int'ah, 'et nuwheni chah 'et 'uts'oot'e. 'Ink'ez nts'e na'a hoh hooya hiyulhtsi, nuwheni chah ts'uhóolhchoot. ¹⁴ 'Et ndi yun k'ut 'aw keyah 'ilhuz 'uwhutet'ilh hoolah ho' hoont'ah. 'Et whunts'ih ndet keyah 'ilhuz 'uwhutet'ilh, 'et whuz de whélt's'ulh, 'et zeh hukwa ts'ítés'en. ¹⁵ 'Et huwa Sizi Gri boozi bugha 'ahoolhyez Yak'usda chanailya uzdóoni.

'Et whuz na'a Yak'usda uzdóolhti. ¹⁶ 'Et hoonzoo 'uwhulh'en 'ink'ez ts'iyawh 'ilho lhula' daht'en, 'et khun whunaooodoolhúnah gunih. 'Et whuz na'a Yak'usda bugha whut'aih, ts'iyawh 'et tube hóont'i. ¹⁷ Nuhtsuh whudéldzulh, 'en hubuk'une' 'ooht'en 'ink'ez hubutl'á' dudoohlúyelh. 'En nuhzul nuhwhuba ghuhindli 'uhint'ah 'et huwa. 'Ink'ez nts'e na'a nuhwhuba highunli, 'et hube 'ut'en whugha Yak'usda but huteyin. 'Et huwa soo ts'ah'un na'a niwhúnah'aih. 'Et whuz na'a ndaht'en t'eh, 'et ndunnah whutsuh whudéldzulh huhót'i hoh Yak'usda ba nuhghú hoole huba' hoont'ah wule. Khun teh nuhwheni nuhgha khunani wahle gunih. 'Et ndaht'en t'eh, 'et zeh nuhwhuba whutézoo.

Neba tenadoohdli

¹⁸ Ts'ah'un na'a t'ets'oninzun neyuh ts'ih bugha t'ets'oninzun, 'i 'aw hoonliyaz hoontsi' bughah hoolah. Whuz na'a zeh ts'otétun hukwa 'uzninzun. Whuz na'a neba tenadoohdli. ¹⁹ 'Et 'o 'un chah nuhts'u téodusdli, suba tenadoohdli, 'et sih 'aho Yak'usda nuhts'ó tl'anasoohltelh.

Ye unzoo, 'i nohwhulh 'Óot'e

²⁰ 'Aw 'et Yak'usda 'en be nedzi ts'ah'un 'oot'e negha óoni'ai, 'en neMoodihti Sizi Gri buzkai be neba nadélt'ik, 'et huwa yahadla tah dinaidilhti. 'En sheep ghuunli ncha 'int'ah. 'Ink'ez ndi 'uskai 'i be 'ilhuz wheni khunek neba lhaídinla, 'i ho' 'int'ah. ²¹ 'Et Yak'usda soo ts'ah'un na'a lhadulya nuhtelhtsilh, 'et whuz na'a nuhwhuba tenadutesdli. 'Et hoh Yak'usda nts'e na'a nuhts'u hukwa' ninzun, 'et ts'iyawh huba 'uwháhla. 'Ink'ez ndai Yak'usda Sizi Gri be'et nuhwhuba 'uwhulh'en, 'et 'uhóonla t'eh, 'et nduhóolhcho hoh

Hebrew Khunek K'uyahalhtuk 13:22xlvii Hebrew Khunek K'uyahalhtuk 13:25

hootét'i. 'En zeh 'ilhuz wheni buba ts'odóolhti.
'Et ndoh honeh. ²² 'Et sulhutsinkah, soo cho
nuhts'u téodusdlih ndi khunek 'i be nus nóoht'uk,
'i ts'iyawh soo cho óozelhts'ai 'ink'ez nuhwhuba
'alha 'oot'e. 'Et whunts'ih 'aw lhat 'uk'echá'iduguz.
²³ Nelhutsin Timothy tsak'esda, 'en 'aw 'et tinánya,
'et t'ewhunoohzeh hukwa' nuszun. 'Et 'aho
whusanája t'eh, 'en bulh nuhts'un tadút'us.
²⁴ Nuhtsuh whudélhdzulh chah, 'ink'ez dune
Yak'usda bube'ildzun, 'en chah suba dahooja
budóohni. Yun k'ut Italy whut'en, 'en chah dahooja
nuhuwhútni. ²⁵ Nuhwheni ts'iyawh ndi Yak'usda
ye unzoo, 'i nohwhulh 'oot'e nuhwhuba hukwa'
nuszun. 'Et ndoh honeh.

**Yak'usda bughunek: k'andit khunek neba
Ihaidinla
New Testament in Carrier, Southern (CA:caf:Carrier,
Southern)**

copyright © 2002 Wycliffe Bible Translators, Inc.

Language: Carrier, Southern

Translation by: Wycliffe Bible Translators, Inc.

Carrier, Southern [caf], Canada

Copyright Information

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Carrier, Southern

© 2002, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

f3f87939-bb58-59c1-9788-d872c7ab79b0